


NZAMBE NA NGUYA

AZIPOLAMI LIBOSO NA BISO

 Nazali na mwa Makomi awa, oyo nalingi kosolola na bino likolo na yango, pe natii motema ete Nzambe akopambola mwa makasi na biso.

² Sikawa, bato mingi bazali komituna mpo na nini tozalaka bato ya ndenge mosusu pe ya makelele boye. Boyebi, oyo ezali lolenge ya—ya likita oyo ekeseni na oyo bato ba—bamesana komona. Pe, na momesano, makambo nyonso ezalaka lokola ebongisama liboso. Kasi ntango toyaka na makita oyo, ndenge nasila kozua litómba ya koya mibu na mibu uta ntango makita yango ebandaki mbala ya liboso, toyebaka mpenza te eloko nini tokosala. Toyaka kaka pe tomitikaka. Yango nde likambo bobele moko oyo tosengeli kosala. Pe Nzambe asalaka oyo etikali. Na bongo, yango ekómisaka biso bato ya kosala makambo ya ndenge mosusu.

³ Mokolo wana, moto moko alobaki: “Boyebi, bino bozali mpenza bato ya ndenge mosusu.”

Nalobaki: “Ee, na—nakanisi bongo.”

⁴ Pe nazali kokanisa moko na makita yango. Ndeko Troy ayebisaki ngai mokolo moko lisolo ya elenge moko ya Allemagne oyo alobaki ete azuaki libatisi ya Molimo Mosantu. Pe, na mokolo oyo elandaki, na esika azalaki kosala, azalaki kotombola maboko, kosanzola Nkolo, koloba minoko na sika pe kosala mpenza makambo ya ndenge mosusu. Pe na suka, mokonzi na mosala ayaki pe alobaki: “Heini, likambo nini ekómeli yo?”

⁵ Alobaki: “Oh, nabikisami.” Alobaki: “Motema na ngai ezali kaka kotonda na esengo.”

⁶ Alobaki: “Boye, esengeli kozala ete okendeki kosangana na etonga ya bilema [na lokota ya Ngelesa, Ndeko Branham alobi: ‘nut’ elingi koloba ‘ekrú’, kasi elingi pe koloba ‘elema.’—N.D.T.] oyo kuna.”

⁷ Alobaki: “Iyo. Nkembo na Nzambe!” Alobaki: “Natondi Nkolo mpo na bilema.” Alobaki—alobaki: “Zua naino motuka, oyo ezali kotambola na nzela.” Alobaki: “Longola yango ba-ekrú nyonso, okotikala kaka na liboke ya ‘manzanza.’” Pe yango mpenza nde . . . Elingaki mpenza kokokana, bomoni.

⁸ Mokolo moko, na Californie, nazalaki kotambola na babalabala ya Los Angeles, pe namonaki mobali moko oyo alataki elembo moko na ntolo na ye, pe *awa*. Akomaki: “Nazali liboma mpo na Klisto.” Pe bato nyonso bazalaki kotala ye.

Pe nazalaki komona bango kobaluka pe kotala, nsima na ye koleka. Pe nazuaki likanisi ya kosala lokola bango. Bongo na . . . mokongo na ye, akomaki: “Yo ozali liboma mpo na nani?” Iyo. Nabanzi ete biso nyonso tozalaka mwa ndenge, moko epai na mosusu, boyebi.

⁹ Kasi, boyebi, mokili ekoti mpenza kati na momesano ya mabe, na lolenge ete eloko nyonso oyo ekesani, emonanaka mpenza ndenge, na lolenge ete bato bazali kokanisa ete ezali eloko moko ya malamau te. Pe na momesano, Nzambe asengelaka kosala likambo oyo ekesani mpenza na momesano, mpo na kozongisa lisusu bato na Biblia.

¹⁰ Nakanisi ete Noa azalaki mwa—mwa elema, mpo na eleko ya zebi oyo azalaki kobika kati na yango, mpamba te bazalaki na makoki ya kotalisa polele ete kuna na likolo, mai ezalaki te. Kasi Nzambe alobaki ete mai ekozala kuna. Bongo, Noa, lokola azalaki koteya pe kondima yango, akómaki elema.

¹¹ Pe nakanisi ete ntango Mose akendeki na Ezipito, azalaki mwa—mwa elema, mpo na Falo. Kasi bomikanisela, Falo pe azalaki elema, mpo na ye. Bongo ba . . . Tomoni bongo.

¹² Ata Yesu atangamaki lokola mopengwi. Ya solo. Martin Luther azalaki elema, mpo na lingomba Katoliko. Pe John Wesley azalaki elema, mpo na lingomba Anglikani. Na bongo, boyebi, ntango elingi—elingi kokoka mpo na elema mosusu. Bomoni bongo te? [Losambo balobi: “Amen.”—N.D.E.] Kasi, liboso ete ekrú [to elema—N.D.T.] ezala, boyebi, esengeli liboso ete vis ezala, mpo ekangama na yango.

¹³ Na bongo, boyebi, lokola Noa azalaki ekrú [to elema], a . . . Esengeli ete ekrú ézala, yango nde ebendaka vis, ebendaka eloko esika moko, pe ekangaka eloko esika moko. Na bongo, Noa azalaki na makoki ya kokotisa baoyo nyonso bandimaki, na kati na masúwa, libanda na kosambisama, lokola azalaki ekrú.

¹⁴ Tomoni, ete, Mose abendaki lingomba libanda na Ezipito, lokola azalaki ekrú [to elema]. Ya solo.

¹⁵ Nakanisi ete tozali na bosenga ya ekrú [to elema] moko sikawa, mpo na kobenda Mwasi na libala libanda na lingomba. Tozali na bosenga ya eloko moko sikawa, moto mosusu, bongo tozali mpenza bato ya lolenge mosusu. Pe nakanisaki, na mpokwa oyo, soki Nkolo alingi, ete námeke kotanga mwa Makomi oyo etali likambo oyo, násolola na bino bobele na mwa ntango moke, pe námeke kotalisa bino ntina nini tozali bato ya ndenge mosusu.

¹⁶ Tofungola Makomi sikawa, na Bafilipi mokapo ya 2:1-8, pe Bakolinti ya Mibale 3:6. Pe totanga, wana tozali kondima Liloba na Nzambe.

¹⁷ Pe sikawa, liboso ete totanga, togumba mitó mpo na kobondela.

¹⁸ Tata na Likolo pe na ngolu, tozali solo libota oyo ezui litómba, na mpokwa oyo, ya kobika na eleko oyo, pe komona makambo oyo tozali komona wana ezali kosalema, pe koyeba ete ntango ebelemi mpenza, oyo Yesu akoya kozua Lingomba na Ye. Oh, yango ezali kosepelisa mitema na biso, Nkolo! Pe wana tozali kobalola nkasa oyo na mpokwa oyo, tobondeli ete Ópesa biso ntina ya makomi oyo. Pe tika ete Molimo Mosantu amonisa na mitema na biso makambo oyo ekozala malamumu pe ekosepelisa Nzambe. Mpo tosengei yango na Nkombo na Yesu. Amen.

¹⁹ Boyebi, nakanisi ete nakosenga bino bosala likambo moko. Na momesano na—nasengaka makambo moko ya ndenge, pe nazali kolikia ete nakosenga te eloko moko ya ndenge mosusu. Kasi ntango topesaka bendele limemia, biso nyonso totelemaka. Pe—pe ntango bendele ezali koleka, totelemaka; tosengei kosala bongo. Bongo totelemaka, mpo na kopesa yango losako. Totelema naino wana tozali kotanga Liloba, soki bolingi, na Bakolinti ya Mibale 3:6.

Ye . . . abongisi biso ete tozala basali na kondimana na sika, oyo na mibeko mikomami te kasi oyo na molimo; mpo likomi ekobomaka nde molimo ekopesaka bomoi.

Mosala—mosala na kosalela kufa, oyo ekomami na bilembo likolo na mabanga, eyaki na nkembo pe bongo bana na Yisalaele bakokaki kotala elongi na Mose te mpo na nkembo na elongi na ye, ata ezalaki naino kolimwa.

Boye mpo na nini mosala na kosalela molimo ekozala na nkembo na koleka te?

Mpo, soko mosala na kosalela bikweli ezalaki na nkembo, boye mosala na kosalela boyengebene ekoleka na nkembo mingi.

Mpo ete eloko ezalaki na nkembo ekozanga nkembo liboso na nkembo mosusu oyo eleki yango.

Zambi soko oyo elimwi ezali na nkembo, boni . . . to oyo ezali koumela ekozala na nkembo koleka.

Awa ezali biso na elikia yango, tokolobaka polele mpenza.

Tozali lokola Mose te oyo atiaki elamba liboso na elongi na ye ete bana na Yisalaele bamona nkembo na kolimwa te.

Kasi bikaniselo na bango itiami bozito, mpo ete kino lelo oyo, ekotangaka bango kondimana na kala, elamba yango eumeli, elongwi te. Ekolongwa bobele na nzela na Klisto.

Kino lelo oyo, wana mokanda na Mose ezali kotangama, elamba elali na mitema na bango.

Kasi wana moto akobongwana epai na Nkolo, elamba ekolongwa. Ezali te. . .

Nkolo azali Molimo; pe na esika ezali Molimo na Nkolo, bosomi pe ezali wana.

Pe biso nyonso na bilongi bisili kozipwa, tokozongisaka nkembo na Nkolo lokola talatala; kobongwana kino motindo na ye longwa na nkembo moko kino na nkembo mosusu.

²⁰ Pe na Bafilipi 2, totangi boye, kobanda na molongo ya 1, pe tokotanga kino na oyo ya 8.

Boye—boye soko Klisto alendisi bino, soko abondisi bino kati na bolingo, . . . bosangani na Molimo, soko bozali na boboto ya mawa,

Botondisa esengo na ngai ete bokanisa nzela moko, bozala na bolingo moko, bosangana kati na motema moko pe na lobanzo moko.

Bosala likambo moko mpo na elulela soko mpo na nzoto te kasi, awa ezali bino na kosokema, botanga bamosusu ete baleki bino.

Moto na moto atala bobele makambo na ye moko te, kasi. . . makambo na bamosusu lokola.

Bokanisa kati na bino yango ekanisaki Klisto Yesu.

Ata azalaki na motindo na Nzambe, atangaki te ete ameka kokoka na Nzambe,

Nde amiyeisi mpamba, akamati motindo na moómbó, abotami na lolenge na bato.

Ezuami ye na motindo na moto, amisokisi pe atosi kino kufa, ee, kino kufa na ekulusu.

²¹ Tobondela.

²² Tata na Likolo, Liloba oyo ya nkembo euti kotangama na mpokwa oyo, na Makomi na Yo Mosantu, kómísa Yango mpenza solo na mitema na biso, ete tobima awa lokola baoyo bautaki na Emausu, koloba: “Wana ezalaki Ye kosolola na biso na nzela, mitema na biso ezalaki na móto kati na biso te?” Mpo ete tosengi yango na Nkombo na Yesu. Amen.

Bokoki kofanda.

²³ Sikawa, oyo ezali makomi moko ndenge, kasi nakanisi ete elongobani mpenza na libaku oyo. Nalingi koteya na ntina na: *Nzambe Na Nguya Azipolami Liboso Na Bisó.*

²⁴ Sikawa, uta moto akelámá, mposa moko ezalaka na motema ya moto, ya koyeba: esika auta; ntina na ye awa; pe esika azali kokende. Moko mpamba nde akoki koyanola na yango, ezali Ye oyo amemaki moto awa. Pe moto azalaka ntango nyonso na mposa ya komona Nzambe.

²⁵ Kalakala na Kondimana na Kala, tomoni ete Nzambe Azaláká komizipa na miso ya bazangi kondima. Nzambe azalaka na mayele ya ndenge mosusu ya kosala elongo na bato. Amibombaka liboso na mozangi kondima pe Amimonisaka epai na mondimi. Nzambe asalaka bongo. Yesu atondaki Tata, ete, “Abombaki makambo oyo liboso na bato na mayele pe na basosoli pe Asepelaki komonisa Yango epai na bana mike, oyo bakolinga koyekola.” Bongo, tomoni ete Nzambe abongwanaka soki moke te, na lolenge na Ye, pe Asalaka mosala na Ye ntango nyonso ndenge moko. Tomoni, na Malaki 3, ete Alobaki: “Ngai Nzambe, pe Nakobongwana te.” Boye, Asalaka, mbala nyonso, kolandana na mobeko moko.

²⁶ Sikawa, tókamata moko na babuku ya kalakala na Biblia. Ntango Yobo, oyo azalaki moko na bato ya sembo koleka na eleko na ye, moto oyo abongi be kati na mibeko na Nzambe, mosali, mosali monene pe ya lokumu, na lolenge ete Nzambe alobaki: “Mosusu azali lokola ye kati na mokili te.” Kasi. . . na ntango moko azalaki na mposa ya komona Nzambe. Ayebaki ete Nzambe moko azali, pe ayokaki mposa ya komona Ye, to, na elobeli mosusu, ya kokende na ndako na Ye pe kobeta na ekuke, pe koloba: “Nazali na mposa ya kosolola na Yo.” Kofanda, kosolola na Ye, ndenge biso bato tosololaka.

²⁷ Tozali na boyokani. Yango wana tozalaka na makita oyo, esika tokutanaka mpo—mpo na kotalisa makanisi na biso. Pe—pe toyokanaka kati na biso, malamukoleka, ntango tosololaka makambo elongo. Pe batei basalaka bongo. Bato ya ndenge na ndenge basalaka bongo, basololaka makambo elongo.

²⁸ Pe, Yobo, Nzambe azalaki mpenza solo mpo na ye, alingaki koyeba soki akokaki te kokende, kobeta na ekuke na Ye, pe—pe kosolola na Ye.

²⁹ Kasi tomoni ete Nzambe asololaki na ye solo, kasi nde Azipamaki. Azipamaki na lolenge ya ekumbaki. Pe Ayebisaki Yobo ete ámikanga loketo; Alingaki kosolola na ye, lokola moto. Pe Akitaki kati na ekumbaki pe—pe Asololaki na Yobo. Pe Amitalisaki epai na Yobo na nzela na ekumbaki, atako amonaki Ye mpenza te. Azalaki bobele koyoka mopepe kopepa pe kozunguluka, na banzete. Pe Mongongo ebimaki na ekumbaki, kasi Nzambe azipamaki na ekumbaki.

³⁰ Tomoni, kuna na Afrika, na Afrika ya Súdi, basalelaka liloba *amoyah*, oyo elingi koloba, “nguya oyo emonanaka te.”

³¹ Pe Nguya yango oyo emonanaka te, kati na ekumbaki, ezalaki na Mongongo moko oyo eyokanaki polele. Esololaki na Yobo, atako amonaki lolenge na Ye te. Kasi Azipamaki, na miso na ye, na ekumbaki.

³² Tomoni ete moko na basakoli minene ya Biblia, Mose, ya Kondimana na Kala, moko na basali oyo Nzambe aponá, akamátá, abongísá, ye pe azalaki na mposa ya komona Ye.

Azaláká mpenza pene na Ye, pe amónáká mpenza makambo ebele uta na loboko na Ye monene ya kokamwa oyo ezalaki kokende liboso na ye pe kosala makambo oyo kaka Nzambe nde akokaki kosala. Azalaki na mposa ya komona Ye mokolo moko, pe Nzambe alobaki na ye: “Kende, telema likolo na libanga.”

³³ Pe wana Mose atelemaki likolo na libanga, amonaki Ye koleka. Amonaki mokongo na Ye. Pe alobaki: “Ezalaki lokola moto, mokongo ya moto.” Nzoka nde amomaki Nzambe te. Amonaki bobele ezipeli ya Nzambe.

³⁴ Biblia elobi: “Moto ata moko te amoni Nzambe; kasi Ye oyo abotami Likinda na Tata, Ye wana asili kolimbola Ye.” Bongo, Mose amonaki Ye, Azipami, lokola Moto. Tomoni ete Yawe ya Kondimana na Kala ezalaki bobele Yesu ya Kondimana na Sika.

³⁵ Pe—pe Dr. Scofield awa, tomoni ete, liloba na ye, ebongwani longwa na “lolenge.” Tomoni liloba *en morphe*, na lokota ya ba-Grek, oyo elingi koloba “oyo emonanaka te ekómaki komonana.” Eloko oyo ekoki te. . . Toyebi ete ezali wana. Ekoki kozala. . . ekoki komonana te, kasi toyebi ete ezali wana. Pe ntango Abongolaki lolenge na Ye, ya *en morphe*, yango elingi koloba ete Abongwanaki longwa na oyo eleki likolo kino na oyo ya mokili.

³⁶ Pe Alataki bobele máske mosusu, na elobeli mosusu. Ezali lokola na teátre. Azalaki mosani. Pe epai na ba-Grek, ntango bazalaki kolata máske mosusu, mbala mosusu kaka na lisano moko wana, mosani moko akokaki kosala misala ndenge na ndenge.

³⁷ Pe mwana na ngai ya mwasi, oyo azali awa, bauti ko—kosala teátre moko, na école secondaire. Pe mwana mobali moko oyo nayebi, asalaki mosala ya bato soko minei, ye moko azalaki kokende na nsima ya ridó kolata lo—lolenge mosusu, pe kozonga mpo ete kosala lokola moto mosusu.

³⁸ Sikawa, soki botali bisakweli ya Kondimana na Kala likolo na oyo Masiya asengelaki kozala, bokoki kokokanisa yango na bomoi ya Yesu, pe bokososola mpenza oyo Yesu azalaki. Azalaki bobele moto lokola bato nyonso te. Azalaki Nzambe, *en morphe*. Abongwanaki longwa—longwa na oyo eleki likolo kino na lolenge ya mokili ya Moto. Nzoka nde, Azalaki Nzambe, oyo amonisami kati na mosuni, oyo azipami na ezipeli ya mosuni na moto.

Pe botala malamumu Kondimana na Kala.

³⁹ Na—na—nayebi ete na mpokwa oyo, nazali koteya na liyangani oyo esangisi bato ya ndenge na ndenge, baoyo bauti bipai na bipai kati na mokili. Pe toyei awa mpo tomona polele. Tozali—tozali kosala nini? Tozali—tozali banani? Tozali kokende wapi? Nini ezali kosalema? Nyonso oyo elingi koloba nini?

⁴⁰ Pe sikawa tomoni, awa, ete ndambo na Bayuda, basi pe mibali, ná ba-lábi kati—kati—kati na tempelo, kalakala. Soki

batalaki Biblia malamumu, bisakweli, na esika ya mimesano, balingaki koyeba nani Yesu azalaki. Balingaki kobenga Ye Belezebula soki moke te. Balingaki kobáka Ye na ekulusu soki moke te. Kasi nyonso wana esengelaki kosalema. Ezali eteni ya teátre. Pe bazipamaki miso, na likambo oyo.

⁴¹ Ezali lokola mingi kati na bino, mibali pe basi oyo bozali awa na mpokwa oyo, oyo bokoki kozala na mibu na ngai to koleka mwa moke. Bozali komikanisela, eleki mwa mibu, awa na Amerika, liboso. . . Ba-Chinwá. . . Ndeko na ngai ya mobali, oyo auti kotalisama awa, likambo yango eyelaki ngai na makanisi ntango nazalaki kosolola na ye. Ndenge bazalaki ko. . . Bayebaki koloba Ngelesa te, pe ba—bazalaki na bakompani ya kosukola bilamba. Pe bato bazalaki kokende na bakompani na bango, mpo na kosukolisa bilamba. Ba—basukoli bilamba epai ya ba-Chinwá bazalaki kozua eteni ya lokasa, pe kopasola yango na ndenge moko boye. Yo ozui eteni moko ya lokasa yango, ye azui eteni mosusu. Kasi ntango ókozonga mpo na kozua bilamba na yo, biteni yango mibale ya lokasa esengeli kokutana. Pe soki ekutani mpenza malamumu te. . . Ata ndenge nini, bato bazalaki kokoka komekola yango te, mpo ete ye azalaki na eteni moko, pe yo na eteni mosusu. Pe soki emekolami. . . Na ntango wana nde ozalaki na makoki ya kozua biloko na yo. Pe na ntango wana nde ozui biloko na yo, ntango ozali na eteni mosusu ya mokanda ya boyokani.

⁴² Ezali pe bongo, na mpokwa oyo, na ntango oyo tozali na eteni mosusu ya mokanda ya boyokani. Ntango Nzambe apasolaki Mwana na Ye na biteni mibale, na Gologota, Anetolaki nzoto lokola Mbeka, pe Atindelaki biso Molimo, oyo efandáká na ntango moko kati na Moto moko, Yesu. Bobele Nzambe yango azipami na mpokwa oyo, na lolenge ya Molimo Mosantu. Biteni yango mibale esengeli kokutana, na ntango wana nde ozali kati na boyokani. Nzambe asalaki bongo mpo moto ayeba Ye malamumu, ntango Amikómisaki Moto.

⁴³ Nazalaki kotanga lisolo moko, eleki mwa mibu. Pe kati na lisolo yango, elobamaki ete mokonzi moko monene, ya lokumu. . . Nabosani nkombo na ye, sikawa. Nazalaki na likanisi ya kobeta lisolo yango te. Mbala mosusu esalema na yango te, kasi ekosunga biso lokola moboko mpo na likambo oyo tolingi koloba. Mokonzi yango, azalaki mokonzi moko ya lokumu mingi, pe alingaki bato na ye mingi mpenza, na lolenge ete, mokolo moko, liboso na—na babateli na ye pe na libota na ye ya bokonzi, alobaki: “Lelo nde mbala na bino ya suka ya komona ngai, mpo na mibu ebele.”

⁴⁴ Babateli na ye pe bankúmú na ye balobaki ye: “Mokonzi malamumu, olobi boye mpo na nini? Olingi nde kokende na mboka mopaya, na esika moko boye, ete okóma mopaya?”

⁴⁵ Alobaki: “Te. Nakozala kaka awa. Kasi,” alobaki, “nalingi kokende kofanda elongo na bato na ngai. Nakokóma mosali bilanga. Nakobanda kokata nkoni elongo na bakati nkoni. Nakobanda kokata bilanga elongo na bakati bilanga. Nakobanda kobongisa nzete ya miwiti elongo na babongisi na nzete ya miwiti. Nakokóma moko na bango, mpo náyéba malamumu makambo oyo basalaka. Pe ngai nalingi bango. Pe nalingi ete náyéba bango malamumu, ngai moko. Bango bakoyeba ngai te. Kasi nde, nalingi nayeba bango, na lolenge wana.”

⁴⁶ Pe na ntongo oyo elandaki, wana bantoma na ye, bato na ye nyonso bamonaki ye, to baoyo bazalaki na ndako na ye, kolongola motole na ye pe kotia yango likolo na kiti, na ngwende; alongolaki monkoto na ye, pe alataki bilamba ya basali bilanga, akendeki kofanda elongo na bato nyonso.

Sikawa, kati na mwa lisolo yango, tomoni bongo liteya na ntina na Nzambe.

⁴⁷ Balobaki na mokonzi, balobaki: “Mokonzi, tosengeli na yo. Tolingi yo. To—tolingi ete otikala mokonzi.” Kasi ye alingaki kokóma moko na bango, koyeba bango malamumu, mpo bango bayeba ye malamumu mpenza, nani ye azalaki. Yango ezalaki mpo na kotalisa bango nani ye azalaki mpenza.

⁴⁸ Pe yango nde oyo Nzambe asalaki. A—Amibongolaki, uta na Yawe Nzambe, Akómaki moko na biso, mpo Akoka konyokwama, Akoka komeka liwa, Akoka koyeba soki tonga ya liwa ezalaki nini, pe Amema etumbu ya liwa Ye moko. Atiaki motole na Ye—na Ye pe monkoto na Ye pembeni, pe Akómaki moko na biso. Asukolaki makaka elongo na ba—na ba—bato mpamba. Afandaki kati na bahema, elongo na babola. Alalaki na—na bazamba pe na babalabala, elongo na bato bazangi ntina. Akómaki moko na biso, mpo ete Akoka kososola biso malamumu, pe biso tokoka kososola Ye malamumu.

⁴⁹ Sikawa, nakanisi tomoni, kati na yango, oyo Asalaki ntango Amibongolaki. Soki botali malamumu, Ayaki na bankombo misato ya mwana. Ayaki na nkombo ya Mwana na moto, ya Mwana na Nzambe, pe ya Mwana na Dawidi. Ayaki lokola Mwana na moto.

⁵⁰ Sikawa, na Ezekiele 2:3, Yawe, Ye moko, abengaki Ezekiele, mosakoli, “mwana na moto.”

⁵¹ *Mwana na moto* elingi koloba “mosakoli.” Asengelaki koya ndenge wana, mpo na kokokisa Dutelonome 18:15, esika Mose alobaki: “Yawe Nzambe na yo akotemisela yo longwa na kati na yo, mosakoli lokola ngai.” Amibengaki Ye moko Mwana na Nzambe soki moke te. Ye moko Amibengaki, “Mwana na moto,” mpo ete Asengelaki koya yengebene na Makomi. Bomoni? Asengelaki kosala ete biteni yango mibale ya lokasa oyo ekatamaki, esakweli ya Kondimana na Kala pe ezaleli na Ye moko, ezala mpenza-mpenza ndenge moko. Bongo, Ayaki, Mwana na moto, Ayaki na lolenge wana.

⁵² Bongo tomoni, nsima na liwa, bokundami, pe lisekwa na Ye, Ayaki na Mokolo ya Pantekote, lokola Mwana na Nzambe; Nzambe, Molimo, na lolenge ya Molimo Mosantu. Azalaki kosala nini? Azalaki Komibongola, Komimonisa epai na libota na Ye na lolenge mosusu. Ndenge Molimo Mosantu, oyo azali Nzambe, Ayaki kosala kati na bileko na lingomba, lokola Mwana na Nzambe, Molimo Mosantu.

⁵³ Kasi, na Bokonzi ya mibu nkoto, Azali koya lokola Mwana na Dawidi, mpo na kofanda na ngwende ya Dawidi, Mokonzi. Ye nde asengelaki kozua ngwende ya Dawidi. Afandi na ngwende ya Tata sikawa. Na nsima Alobaki: “Mpo na molongi Nakopesa ye nzela ya kofanda na Ngai elongo na ngwende na Ngai, lokola Ngai pe nalongi pe nafandi na Tata na Ngai elongo na ngwende na Ye.” Boye, Ye, na Bokonzi ya mibu nkoto, Akozala Mwana na Dawidi. Ezali nini? Kaka Nzambe yango, ntango nyonso, Azali bobele kobongola máske na Ye—na Ye.

Mpo na mwasi na ngai, nazali mobali na ye.

⁵⁴ Bomoni? Mwasi Mosirofenisi alobaki: “E, Mwana na Dawidi, yokela ngai mawa.” Ye, etungisaki Ye ata moke te. Azalaki na makoki ya kobenga Ye bongo te. Azalaki ata na makoki te ya kobenga Ye Mwana na Dawidi. A—Azali Mwana na Dawidi, mpo na Bayuda. Pe sikawa ayei. . . Kasi ntango abengaki Ye: “Nkolo,” Azalaki Nkolo na Ye, na ntango yango nde azuaki eloko oyo asengaki.

Sikawa, boye, Azali bobele Komibongola.

⁵⁵ Sikawa, na ndako na ngai, nazali bato misato. Na ndako na ngai, mwasi na ngai azali na makoki epai na ngai lokola mobali na ye. Mwana na ngai ya mwasi oyo kuna, ye, azali na makoki ata moko te epai na ngai lokola mobali na ye; ngai nazali tata na ye. Pe nkoko na ngai ya moke oyo kuna, nazali nkoko mpo na ye, boye azali na makoki ya kobenga ngai tata te. Ngai nazali tata na ye te. Mwana na ngai nde tata na ye. Ngai nazali nkoko na ye. Kasi nazali kaka moto moko.

⁵⁶ Pe Nzambe, eloko Asalaka, Amibongolaka, mpo Amimonisa na ekeke wana, mpo Amimonisa epai na bato. Pe yango nde likambo toyei koluka komona awa, na mpokwa oyo. Ndenge nini Nzambe asengeli Komimonisa epai na bato oyo pe na eleko oyo? Abongolaka máske na Ye, Abongolaka mosala na Ye, kasi Abongolaka motindo na Ye te. Abongolaka lolenge na Ye—na Ye te. Abongolaka bobele máske na Ye, kotika moko kozua mosusu. Asalaka bongo, mpo Amimonisa polele koleka epai na bato, mpo bakoka koyeba nani Ye azali, pe oyo Ye azali.

⁵⁷ Na Baebele 1, totangi: “Nzambe asololaki na bankoko na minoko na basakoli na mbala mingi pe na mitindo mingi, kasi na mikolo oyo ya suka asololi na biso kati na Mwana na Ye, Yesu.”

⁵⁸ Sikawa, “basakoli,” ntango Yesu azalaki awa na mokili, Alobaki, “bazalaki banzambe. Bino bozali kobenga bango

‘banzambe,’ baoyo Liloba na Nzambe eyeli bango. Pe Likomi ekoki koboyama te,” elobaki Ye. Alobaki: “Ndenge nini bokoki bongo kokweisa Ye, na ntango oyo Ye azali Mwana na Nzambe?” Bomoni?

⁵⁹ Liloba na Nzambe epesamaka na eleko moko na moko, ndenge Yango esengeli kozala. Pe Yesu azalaki bokokisami ya bisakweli nyonso. “Kati na Ye, litondi na Bonzambe efandaki kati na nzoto.” Ezalaki na kati na Ye. Ye nde Azalaki kati na Yosefu. Ye nde Azalaki kati na Eliya. Ye nde Azalaki kati na Mose. Ye nde Azalaki kati na Dawidi, monkonzi oyo aboyamaki.

⁶⁰ Bato na ye moko baboyaki ye, lokola mokonzi. Pe wana azalaki kobima li—libanda na lopango, mwa ebosono moko, oyo azalaki kotambola na mpasi, azalaki kosepela te na—na lolenge na ye ya kokamba, ya koyangela, pe abwakelaki ye nsoi. Pe mobateli abimisaki mopanga na ye, alobaki: “Natika mpenza nkingo ya mbwa oyo, ndenge abwakeli mokonzi na ngai nsoi?”

⁶¹ Pe Dawidi, mbala mosusu na ntango yango azalaki kososola likambo oyo azalaki kosala te, kasi apakolamaki. Bongo alobaki: “Botika ye. Nzambe nde ayebisi ye ete asala bongo.” Pe amataki likolo na ngomba pe alelaki mpo na Yelusaleme, mokonzi oyo aboyami.

⁶² Bomoni? Mwa nkama na mibu nsima na yango, babwakelaki Mwana na Dawidi nsoi, na babalabala, pe azalaki likolo na ngomba, kaka na ngomba yango, Abwakaki miso likolo na Yelusaleme, Mokonzi oyo aboyami. Pe Agangaki: “E Yelusaleme, mbala boni nalingaki kosangisa bino lokola nsoso akosangisaka bana na ye na nse na mapapu na ye, nde bolingaki te?”

⁶³ Abongolaki lolenge na Ye soki moke te, mpo ete Baebele 13:8 elobi: “Azali motindo moko lobi, lelo, pe libela.” Nzambe akómaki mosuni, na ntina ete akufa, mpo na kosikola biso na masumu. Yango wana Amibongolaki Ye moko, ete Akóma Mo—Moto.

⁶⁴ Tomoni, na Yoane 12:20, ba-Grek bayokaki nsango na Ye. Nzoka nde, moto moko te akoki koyoka nsango na Ye kozanga ete motema na ye esepela na komona Ye. Lokola Yobo pe basakoli ya kala, bango nyonso bazalaki na mposa ya komona Ye. Na bongo, ba-Grek oyo bayaki mpo bamona Ye. Bayaki epai na Filipino, oyo azalaki moto na Betesaida, balobaki: “Misie, tozali na mposa ya komona Yesu.”

⁶⁵ Ba-Grek bazalaki na mposa ya komona Ye, kasi bakokaki komona Ye te mpo Azalaki kati na tempelo ya bomoto na Ye. “Nzambe azalaki kati na Klisto, kozongisa bato na mokili na bondeko epai na Ye.” Sikawa, tomoni ete, na oyo, ba-Grek yango bakokaki komona Ye te.

⁶⁶ Pe botala malamumu maloba mpenza oyo Yesu alobelaki bango, na nsima na yango. Alobaki: “Soko mbuma na masangu ekokwea, pe ekokufa te, ekotikala bobele moko mpenza.” Na

elobeli mosusu, bakokaki soki moke te komona Ye kati na mbongwana, kati na máske oyo Azalaki kati na yango na ntango wana, mpo ete Azipamaki na mosuni ya moto. Kasi ntango mbuma oyo ya Lisangu ekweaki na mabele, na ntango yango nde elingaki kobota mabota nyonso. Atindamaki epai na Bayuda, solo, na ntango wana. Kasi mbuma na Lisangu esengeli kokwea; Nzambe azipami, na mosuni ya moto, Abombami na miso na bazangi kondima, kasi Amonisami epai na bandimi.

⁶⁷ Na Yoane 1: “Na ebandeli Liloba azalaki, pe Liloba azalaki mboka na Nzambe, Liloba azalaki pe Nzambe. Liloba akómi mosuni pe afandi kati na biso, pe tomoni Ye, mwana-na-likinda longwa na Tata; atondi na ngolu.” Sikawa, na ebandeli Liloba azalaki. Liloba ezali likanisi oyo elobami.

⁶⁸ Na ebandeli, Azalaki ata Nzambe te. Nzoka nde, liloba oyo *Nzambe* na Ngelesa na biso lelo, elingi koloba “eloko ya kosambela.” Epesaka mpenza mobulu na makanisi. Okoki kokómisa moto nzambe. Okoki kokómisa eloko soki nini nzambe.

⁶⁹ Kasi na Kondimana na Kala, na Genese 1: “Na ebandeli *Nzambe*,” liloba oyo basaleli ezali Elohim. *Elohim* elingi koloba “oyo azali uta na Ye moko.” Bokeseni ezali monene kati na liloba oyo Elohim, ná liloba na biso oyo Nzambe. *Elohim* elingi koloba “oyo azali uta na Ye moko.”

⁷⁰ Bisó tokoki te kozala uta na biso moko. Tokoki te kozala na nguya nyonso, na bokasi nyonso, na bisika nyonso, na boyebi nyonso. Liloba oyo Elohim ezali kotalisa nyonso wana. Bisó tokoki te kozala bongo. Nzete oyo osali nzambe uta na yango, to—to ndako, ezali uta na yango moko te.

⁷¹ Boye, Nzambe, na ebandeli, azalaki Bomoi, Oyo ya Seko. Kati na Ye, makoki ezalaki, pe makoki yango ekómaki Maloba, pe Liloba ekómaki mosuni. Yesu azalaki Mosikoli. Pe *kosikola*, elingi koloba, “kozongisa.” Soki Asengeli kozongisa eloko moko, esengelaki liboso ete eloko yango ézala na esika moko boye mpo ézóngisama wana. Boye, bomoni, bato nyonso te nde bakozala na makoki ya komona yango, mpo ete, bato nyonso te nde bazalaki na ebandeli kati na makanisi na Nzambe. Bomoni?

⁷² Botala banganzambe. Ntango bamonaki Ye Komitalisa mpenza yengebene na Liloba, oyo Ye azalaki, balobaki: “Ézali Belezebula.” Yango ezalaki kotalisa lolenge na bango. Ekokanaki na makanisi ya bato ya mikolo wana.

⁷³ Kasi elenge mwasi yango ya pite, oyo Akutanaki na ye na ekuke, pe Alobelaki ye, Amonisaki elembo na Ye ya Masiya, wana Ayebisaki ye makambo asalaki. “Boye,” alobaki, “Misie, namoni ete Ozali Mosakoli. Toyebi ete, Masiya, ntango Akoya, Akoyebisa biso makambo oyo nyonso.” Ayebaki Ye lokola Masiya, Mopakolami, mpo ete Akokisaki makambo oyo Makomi esengaki. Bomoni bongo te? [Losambo balobi: “Amen.”—N.D.E.]

Biteni nyonso mibale ya lokasa ezalaki kokutana. Mwasi alobaki: “Toyebi ete, ntango Masiya akoya.”

⁷⁴ Bongo, ntango mosusu Nzambe asengelaki kosangisa *oyo* ná *oyo boye*, mpo na kozua lolenge moko ya makelele ya ngonga, lokola mosali ya ngonga. Kasi ntango Yesu abalukaki, Alobaki: “Ngai nazali Ye, Ngai oyo nazali kosolola na yo,” elobeli lokola “Belezebula” ezalaki te. Atikaki mbeki na ye, akendeki mbangu kati na engumba, pe alobaki: “Boya komona Moto Oyo alobi na ngai makambo masali ngai. Ye akoki kozala Masiya solo te?” Bomoni?

⁷⁵ Sikawa, yango esalaki nini? Ezalaki kokutanisa Makomi ya kala ná lobiko oyo—oyo Yesu azalaki kopesa ye, yango esalaki nini? Ebimisaki Masiya. Pe bomoni yango malamumu? Nokinoki, masumu na ye elimbisamaki, mpo ete, na ebandeli, akokaki kosikolama, mpo ete azalaki kati na makanisi na Nzambe na ebandeli. Na bongo, yango esikolaki ye, to ezongisaki ye, ntango amonaki Makomi oyo elobamáká komonisama, ya Yawe, oyo Ye azalaki, oyo Ye azali.

⁷⁶ Bongo, ntango Yesu ayaki, soki áyáka na nsango ya Noa, elingaki kobonga te. Kotonga masúwa, pe kotepatepa likolo na mai, elingaki kobonga te. Kasi Noa azalaki eteni ya Nzambe. Asalaki makambo ya ndenge mosusu mpo ete azalaki moto ya ndenge mosusu, pe nsango na ye ezalaki ya ndenge mosusu mpo ete ezalaki Liloba oyo emonisami.

⁷⁷ Akokaki koya na nsango ya Mose te, mpo ete elingaki kobonga te. Mose azalaki Nzambe oyo amonisami na ndambo. Azalaki liloba oyo emonisamaki mpo na eleko wana, kasi Yesu akokaki koya bongo te. Biblia elobaki soki moke te ete Akoya bongo.

⁷⁸ Kasi ntango Ayaki, Atalisamaki polele nde—ndenge Kondimana esiláká koloba ete Akotalisama, na bongo baoyo nyonso bakokaki kosikolama bandimaki Yango, mpo ete bazalaki makanisi ya Nzambe. Makanisi na Ye ya ebandeli ekómaki mosuni, pe ekokaki kosikolama, pe ezongisamaki epai na Nzambe. “Kasi epai na baoyo bayambi Ye, apesi bango bokonzi na kozala bana na Nzambe,” mpo ete bakokaki kosikolama. Bazalaki uta na ebandeli, kati na botalisami.

⁷⁹ Soki tokoki kotelema awa mwa moke, soki ekoki kosalema, pe tokanisa naino, na mpokwa oyo, na ntina na Nsango ya ntango, makanisi na Yawe oyo emonisami. “Liboso na kozalisama na mokili,” bayebisi biso, “bankombo na biso esila kokomama na Buku na Bomoi ya Mwana na Mpate.” Wana nde tokoki komona ngambo nyonso mibale, ndenge nalobaki liboso, ete moto na moto azali ndenge mpo na moto mosusu. Esengeli kozala bongo. Ezalaka ntango nyonso bongo. Ezalaka ntango nyonso ndenge wana, pe ekozala ntango nyonso ndenge wana.

“Azalaki Liloba. Pe Liloba akómaki mosuni pe afandaki kati na biso.”

⁸⁰ Sikawa, Nzambe, na . . .kuna na ntango na Kondimana na Kala, tomoni ete nsima na Ye komimonisa epai na bato na Ye, na lolenge ebele, Amizipaki nsima na bamposo ya kala ya gambala. Nzambe amibombi na nsima na bamposo ya gambala, na ebóngá na Ye ya mawa. Tomoni ete ndenge Salomona, ntango abulisaki tempelo na Yawe, pe bamposo yango ya gambala etiamaki kuna, ezipeli, ndenge Akotaki kuna na lolenge ya Likonzi na Móto pe ya Lipata, pe Akitaki kuna na nsima, pe Amizipaki, na miso na bato ya libanda. Kasi, na nzela na kondima, Yisalaele bayebaki ete Azalaki kuna na nsima. Bayebaki ete Azalaki kuna, ata soki bapagano bakokaki koloba nini. Abombamaki na miso na mozangi kondima. Kasi mondimi, na nzela na kondima, ayebaki ete Azalaki kuna na nsima. Bazuaki ngolu. Pe Afandaki na ebóngá na Ye ya mawa, bongo ezalaki sekelé monene.

⁸¹ Boyebi, na Kondimana na Kala, kokota nsima na mposo wana ezalaki liwa. Sikawa kozanga kokota kuna ezali liwa. Kalakala kokota na Nkembo na Ye ezalaki liwa. Sikawa kozala mosika na Nkembo na Ye ezali liwa. Yango esalemaki, solo mpenza, ntango ezipeli epasukaki na Gologota, ntango ezipeli epasukaki, ezipeli oyo ya kalakala. Sikawa kotikala mosika na Ye ezali liwa. Kalakala kozala liboso na Ye ezalaki liwa. Bomoni? Ebongwani, elongwe ndenge ezalaki pe ekómi ndenge mosusu, pe bosengeli kozua Makomi mpo na komona ntango nini tozali kobika kati na yango.

⁸² Sikawa, ntango ezipeli epasukaki na Gologota, ebóngá-na-mawa emonanaki polele. (Kasi eloko nini esalemaki? Ebakamaki na Gologota, ezalaki kotangisa Makila.) Ndenge bazalaki kozua makila, mobu na mobu, na ntango ya kopetola esika na bulee pe komwangisa ebóngá-na-mawa, kuna, Nzambe, na nguya na Ye monene ya makasi ya mokalikali, Apasolaki ezipeli yango ya mposo ya gambala kobanda na likolo kino na nse, pe ebóngá-na-mawa emonanaki polele.

⁸³ Mwana na Mpate oyo ya solosolo ya Nzambe, abakamaki polele na miso na bato na Gologota, Ebóngá-na-Mawa ya solo, ntango Nzambe afutaki ntalo, Ye moko; pe Akómaki moko na biso, pe Ye moko Amimonisaki na lolenge ya Moto, mpo Ayeba biso, pe biso toyeba Ye. Ebóngá-na-Mawa emonanaki polele na miso na Yisalaele mobimba mokolo wana ya Bolimbisi.

⁸⁴ Kasi, keba, mimesano ya batata ya lingomba na mikolo wana, na nzela na mimesano na bango, ezipaki Ebóngá-na-Mawa ya solo na miso na bato. Soki báyébaka Makomi, mbele eteni moko na moko elingaki kokutana lokola lokasa wana ya ba-Chinwá. Esakweli ya Kondimana na Kala elingaki kokokisama, pe ekokisamaki. Pe soki bátéyaka bango Makomi, mbele bamonaki Ebóngá-na-Mawa. “Lokola Mose,” elobami

awa, ete “kino lelo oyo, bazipami miso. Ezali naino likolo na mitema na bango.” Bazali komona Yango te.

⁸⁵ Kasi, Azalaki Nzambe, monyoko pe Bolimbisi. Azalaki Ebóngá-na-Mawa ya solosolo oyo emonanaki polele na miso na bato. Ndenge tozalaki koyemba nzembo oyo:

Botala, Ye wana polele na miso na bato.

Ye wana, Molongi na nguya,

Uta Apasólá ezipeli na biteni mibale.

⁸⁶ Bomoni, Ayaki, Ebóngá-na-Mawa, abakami polele na miso na liyangani. Kasi bango, lokola bakonzamaki na makanisi ya bato. . .

⁸⁷ Sikawa, mibali pe basi, ná bantoma oyo bayei na likita oyo, nalingi koloba boye, kozanga kopona bilongi. Kasi, kotala ndenge tozali lelo oyo, kotala ntina oyo toyei awa lelo, nazali kobanga ete mimesano ya batata, batata ya lingomba, ebombi Likambo oyo na miso na bato ebele. Uta Molimo Mosantu ayaki na mikolo na suka oyo, ndenge esakolamaki, pe ezipeli epasukaki, bato ebele mpenza bazali komeka kokangama na mimesano na bango, oyo ya batata. Pe yango wana bazali komona te esengo monene oyo, kimia, pe makambo oyo Lingomba ezali na yango lelo. Nzoka nde, ezali komonana polele na miso na baoyo bandimi.

Abombaki Liloba, Liloba ya elaka ya ntango oyo.

⁸⁸ Sikawa, mimesano esali ezipeli. Balobaka ete ntango na bikamwa esila koleka. Mobali moko asololaki na ngai, moto malamau, ya mayele mingi, na Tukson, Arizona, esika nafandi. Nazalaki na liyangani na Ramada. Pe tozalaki koteya na Likita ya Bato na Mombongo epai wapi Nkolo Yesu ayaki pe asalaki makambo minene. Pe Moklisto yango ayaki epai na ngai, pe alobaki. . . Azalaki motei na lingomba, moto malamau, pe alobaki: “Ndeko Branham, ozali komeka kotalisa bato eleko ya bantoma,” alobaki, “na ntango oyo eleko na bantoma esila koleka.”

⁸⁹ Pe nalobaki: “Nabondeli yo, ndeko na ngai, lakisa ngai, na kati na Makomi, ntango nini eleko ya bantoma esilaki.” Nalobaki: “Eleko ya bantoma ebandaki Mokolo ya Pantekote, pe ezali. . . Petelo alobaki, na Mokolo ya Pantekote: ‘Elaka yango ezali mpo na bino, na bana na bino, na baoyo bazali mosika, baoyo nyonso Nkolo Nzambe na biso akobenga.’ Esilaki ntango nini? Soki Nzambe azali naino kobenga, boye eleko na bantoma ezali se kokoba.”

⁹⁰ Na bongo wana nde esika bato bazali komeka kozipa miso ya ebele na bato, na nzela na mimesano ya bampaka, ndenge ezalaki kalakala. Pe bozali komona te ntina nini bato batondi na esengo boye pe bazali kosepela boye. Pe—pe makita oyo ezali mpenza ndenge, ezali mpenza kokamwisa, mpo na bato mosusu,

ezali mpo bazali komona ete basili kokatisa bipekiselu yango. Bakatisi bizipeli yango, kino na liboso na Nzambe, epai wapi bazali komona elaka oyo emonisami ya ntango oyo, komonisama liboso na bato. Bazali komona eloko oyo Nzambe alakaki.

⁹¹ Na Yoele 2:28, Alakaki, ete “Na mikolo ya suka oyo mbula na nsima *ekonoka* likolo na bato, na mikolo ya suka.” Nakanisi ete liloba ya ba-Grek na esika yango ezali *kenos*, elingi koloba ete “Amisopaki” mobimba. Ezali te lokola tokokaki koloba, ete eloko moko ezalaki na kati na moto, oyo Ye Asopaki. Kasi, Amisopaki Ye moko.

⁹² Abongolaki; *en morphe* na Ye. A—Abongwanaki, uta na oyo Azalaki, kokóma oyo Azali. Abongolaka lolenge na Ye ata moke te. Kasi na mokolo ya Pantekote, Amibongolaki uta na Mwana na moto, kokóma Mwana na Nzambe. Ayaki, *elongo* na bato te. Ayaki *kati* na bato, bomoni, kaka Nzambe wana, mpo na kokoba lotomo na Ye, kati na eleko monene oyo.

⁹³ Asakolaki kati na Biblia, ete “Mokolo moko ekoya oyo ekozala moi te to butu te, kasi na ntango na mpokwa Pole ekozala.” Sikawa, kokokana na mambi ya nse, moi ebimaka na ebimelo na ntango pe elalaka na elimwelo na ntango. Ezali kaka moi yango, ntango nyonso. Nzoka nde, Mwana, M-w-a-n-a, Amimonisaki na kotalisama ya Liloba na elaka, epai na Yisalaale, bato ya Ebimelo na ntango.

⁹⁴ Tolekaki na ntango moko ya molili. Tozalaki na pole oyo ekoki na ntango na babongisi, pe bongo na bongo, mpo na kosala mangomba pe bibongiseli, kosangana na yango pe kokota na kati na yango; pe kopwepwa babebé, kobalisa mikóló, kokunda bakufi, pe bongo na bongo; pe kobika kati na lingomba.

⁹⁵ Kasi, na ntango na mpokwa, “Pole ekozala,” Alobaki, “na ntango na mpokwa.” Pe ata Likomi moko te ekoki kobukama. Pe kaka M-w-a-n-a oyo Amisopaki, *kenos*, na Mokolo ya Pantekote, alakaki ete akosala kaka likambo yango na ntango na mpokwa. Bomoni? Elongobani na elaka.

⁹⁶ Kutanisa biteni yango ya lokasa. Tala nini ezali kosalema, pe tala nini Alakaki, nde okomona esika tokómi. Sangisa yango. Okomona kozipolama ya Moto monene pe ya nguya oyo. Mimesano ezipi lisusu bato miso, liboso na makambo minene oyo esakolamaki.

⁹⁷ Mose, ntango autaki na ngomba, oyo ezalaki kopela Móto, boni etaliseli yango ezali kitoko!

⁹⁸ Mose akendeki na Ezipito koyebisa batata ya lingomba ete Yawe Nzambe ayaki kotala ye na Nkombo ya “NGAI NAZALI.” Nkombo yango ezali na eleko bébe; Ezali te “Ngai nazalaki; nakozala.” Kasi: “NGAI NAZALI,” motindo moko ntango nyonso, motindo moko lobi, lelo, pe libela. Azali eleko bébe. Ye. . . Yango ekokani na Baebele 13:8: “Yesu Klisto, motindo moko lobi, lelo, pe libela.”

⁹⁹ Ezali lisusu Liloba na esakweli. Pe, losambo, esengelaki kokokana na Liloba yango, lobiko ya lelo. Babongisi bazalaki na yango, oh, kasi oyo ezali eleko mosusu. Botala eleko nini tozali kobika kati na yango. Kaka ndenge Akokaki te koya, na mikolo oyo Ayaki na mokili, nde—ndenge Mose ayaki, to ndenge basakoli mosusu bayaki; esakolamá te. Pe na mikolo oyo ya suka, esakolámá ete ekosalema boye. Ekoki te koya na lolenge ya kolamuka ya Luther. Ekoki te koya na lolenge ya kolamuka ya Wesley. Ezali ntango ya bozongisi. Ezali ntango oyo makambo esengeli kozonga na Pole ya ebandeli ya Mwana, oyo ya ebandeli.

¹⁰⁰ Oh, boni tokokaki kolakisa Makomi, na ntina na likambo oyo! Pe bino bato na likindo, ata bouti na eteni nini ya mokili, boyebi ete Ezali ya solo. Ezali elaka. Yango nde ezali kokómisa bato ndenge mosusu. Yango nde ezali kokómisa bato ndenge, ndenge bobengaka bango. Ezali mpo ete ba . . . ezali . . . Ezipeli esili kofungwama, longwa na mimesano, pe bazali komona Yango. Azali motindo moko lobi, lelo, pe libela. Bomoni? Ezali—ezali elaka ya Nzambe, pe tokoki kotelemela yango te, mpo ete Makomi ekoki kobukama te. Iyo. Tomoni ete Alakaki yango. Amisopaki Ye moko kati na bato na Ye. Pe Azali motindo moko lobi, lelo, pe libela.

¹⁰¹ Mose, nsima na ye kokende na Ezipito pe koloba bongo, nde Tata atatulaki nsango na ye, wana Akitaki likolo na Ngomba Sinai, kati na Likonzi na Móto yango, pe ngomba ezingamaki na Móto. Tomonaki malamú? Moto oyo Ye apesaki elaka, Atindaki ye na Liloba. Azalaki na mibeko. Pe mpo na kozua mobeko yango, azalaki na . . . Mibeko yango ezalaki Liloba. Liloba eyaki naino epai na bato te. Na bongo, Liloba eyaka ntango nyonso epai na mosakoli, pe Azalaki mosakoli mpo na eleko wana.

¹⁰² Ndenge moko pe, Yesu azalaki Liloba. Yoane azalaki mosakoli. Pe Yesu ayaki epai na ye, kati na mai, mpo ete Liloba eyaka ntango nyonso epai na mosakoli, ezalaki ntango nyonso bongo. Bomoni? Liloba eyaka epai na ye.

¹⁰³ Bongo, Mose pe, Liloba eyaki epai na ye; mibeko. Pe azalaki na yango. Sikawa, mpo na nini? Liboso ete Liloba epesama pe emonisama, Mose asengelaki kozipa elongi na ye, mpamba te Liloba emonisamaki naino na mobimba te. Bayebaki ete likambo moko eutaki kosalema, kasi bayebaki te soki ezalaki nini, konguluma pe nkake. Kino, balobaki: “Mose áloba, kasi Nzambe te.”

¹⁰⁴ Pe Nzambe alobaki: “Boye, Nakosala bongo. Banda lelo, Nakomonana lisusu boye te. Nakotindela bango mosakoli. Na bongo, ako . . . Nakoloba na nzela na mosakoli na Ngai.”

¹⁰⁵ Sikawa, soki Mose, na mobeko oyo ya mokili, (ndenge Polo amonisi biso awa, na Bakolinti ya Mibale), asengelaki komizipa elongi na oyo ya mokili, boni oyo ya Molimo ekoleka na nkembo pe ekozipama na miso na mozangi kondima liboso

ete emonisamela ye! Koleka boni bakobenga . . . Mose azaláká moto moko ndenge. Koleka boni bakobenga bino, bino baoyo bokatisi ezipeli, bokoti na kati ya Likonzi na Móto, bobimi ná Lipamboli! Pe sikawa bozipami. Bato bakoki komona yango te. Bakoki kososola Yango te.

¹⁰⁶ “Soki oyo ya mokili ezali na nkembo, koleka boni oyo ya molimo! Soki oyo ya mokili, oyo ezalaki na suka, esengelaki kozala na nkembo, koleka boni Oyo ezangi suka, ekozala na nkembo!”

¹⁰⁷ Kasi, nzoka nde, Ezipami. Ezipami te mpo na mondimi, kasi mpo na mozangi kondima. Akoki komona Yango te. Nzambe amizipaka ntango nyonso liboso na mozangi kondima. Mimesano nde ezipaka Yango. Ndenge basalaki kalakala, bazali pe kosala bongo lelo.

¹⁰⁸ Oyo tozali na yango sikawa, ezali ezipeli ya molimo, na esika ezipeli ya mokili ezalaki. Batatolami na mosakoli oyo azali na Liloba oyo ekomami, moto oyo asakolaka, oyo ayaka na Liloba oyo ekomami, mpo na kotalisa Yango polele.

¹⁰⁹ Bayebaki ete Liloba ezalaki wana, kasi bayebaki te nini Yango elingaki koloba. Pe Mose atalisaki Yango polele. Alobaki: “Mobeko elobi *Boye*, pe ntina na yango *yango* oyo.” Atalisaki yango polele. Pe liboso ete Etalisama polele, Ezipamaki.

¹¹⁰ Ezali pe ndenge moko, lelo, ezipami epai na bato, kino Ekomonisama pe Ekotalisama polele epai na bato. Nzambe, Nzambe na nguya, azipami kati na mosuni na moto, Liloba. Botala malamumu. Sikawa tomoni ete ezipamaki epai na mozangi kondima, kasi emonisamaki epai na mondimi.

¹¹¹ Botala malamumu, Mose asengelaki kokota kati na Likonzi na Móto yango, ye moko. Moto moko te akokaki kokende elongo na ye. Ezalaki te . . . yango . . . Elingi koloba nini mpo na biso? Ete bakotaka kati na yango te na komikotisa kati na lisanga ya ba-Pantekotiste. Bomoni? Amonisaki Yango na lisanga moko te. Amonisaki Yango na moto moko. Ezali pe bongo lelo. Okoloba: “Nazali moto ya—ya lingomba moko boye. Na—nazali moto ya etonga *boye*.” Kasi yango ekotambola te. Bomoni?

¹¹² Pe mpo na moto nyonso, komeka kolanda Mose, mpo na komekola yango, ezalaki liwa. Ezali pe bongo lelo, liwa ya molimo, komeka komekola. Yango nde . . .

¹¹³ Na mpokwa oyo, tolingi kokóma nde wana, bokokanisi ya nzoto ekómi komonana kati na bitonga na bato; moto azali komeka kosala makambo lokola Yango, kasi azali kobika ndenge mosusu; akoki komela masanga, akoki komela makaya, basi bakoki kobika na ndenge (nyonso) balingi, lokola mokili, pe kotikala na ndako mpo na kotala televizió, pe makambo ya mokili, kasi bazali kokoba komibenga ba-Pantekotiste. Bazali komeka komekola eloko oyo ya solosolo. Emonisamela bango naino te. Soki Emonisami, ezali na nkembo, pe eloko moko

ekobimisa yango kati na yo soki okoti Kuna. Okómi ezipeli. Ezali . . . Ekotambola te. Pe komekola yango, ezalaki liwa.

¹¹⁴ Ezipeli ya Mose; azalaki Liloba ya bomoi mpo na bato. Pe lelo, bato oyo bazipami bazali ndenge moko. “Bazali mikanda ekomami, etangami na bato nyonso.” Mokanda ya *sika* te; kasi Mokanda oyo ekomami, pe emonisami. Ezali—ezali baoyo bandimi Liloba pe elaka ya lelo, nde Nzambe azali kosopa Molimo na Ye likolo na bango, mosuni nyonso, pe bango nde mikanda oyo ekomami. Pe ntango moto azali komeka komekola yango na lolenge ya nzoto, ekozongela ye. Bomoi na yo ezali kotalisa oyo yo ozali.

¹¹⁵ Mokolo moko, elenge mobali moko, amilukelaki makambo. Azalaki elenge moko malamú, kasi a—akendeke na esambiselo. Bongo mosambisi alobaki: “Namoni ete okwei na likambo. Nasengeli kopesa yo etumbu ya boloko mpo na bomoi na yo mobimba.”

¹¹⁶ Alobaki: “Nalingi nasamba ngai moko.” Alobaki: “Nalingi naloba na ntina na bizaleli malamú na ngai ya kala.”

¹¹⁷ Alobaki: “Ozali ata na bizaleli ya malamú te. Bizaleli na yo ya kala nde ekweisi yo.”

¹¹⁸ Ezali pe bongo lelo, yango wana lingomba ekei liboso te ndenge esengelaki kokende. Ezali mpo na bizaleli. Ezali mpo na lokuta. Tosengeli komipesa mingi koleka. Tosengeli kondima Liloba nyonso ya Nzambe. Tosengeli koluka kino ete Liloba yango ékóma likambo ya solo mpo na biso. Bomoni? Bomoni? Bizaleli nde ezali kopekisa biso ete tokota.

¹¹⁹ Kasi, mokolo moko, (mpo na kosalisa bino ete bobima na motambo oyo), kaka na esambiselo yango, elenge yango azalaki na mbongo te. Azalaki na makoki ya kofuta te. Lomande esengaki bankoto ya ba-dollar. Kasi azalaki na kulutu moko ya mobali oyo ayaki kofutela ye yango.

¹²⁰ Bongo, tozali na Kulutu moko, Yesu, Mwana na Nzambe. Pe Ayaki kofutela biso yango, soki tokoki bobele kondima yango pe kokota na kati ya ezipeli elongo na Ye. Ndenge moko, Ye azali Mose na biso. Yesu azali Mose na biso ya lelo. Mose, ezipeli, azalaki Liloba ya bomoi mpo na bato. Lelo, Yesu, Oyo azipami, Azali Liloba na bomoi mpo na bato, elingi koloba Yesu kati na Lingomba. Molimo Mosantu, Mwana na Nzambe kati na bato, azali komonisa Liloba na nzela na elaka ya lelo, azali kokokisa Yango mpenza. Ndenge moko lelo.

¹²¹ Pe bomikanisela, Mose asalaki yango, pe amonisaki yango, na mokili mobimba te, kasi epai na bato ya esode, kaka etonga moko ya bato, ezali baoyo babimaki uta na eso- . . . kati na esode.

¹²² Lelo pe, Molimo Mosantu, liboso na bato oyo balobaka: “Lobiko na nzoto kouta na Nzambe ekoki kozala solo te.” Ntango nazalaki koyamba bato . . .

123 Mokolo wana, monganga moko abengaki ngai, mpo na elenge mwasi moko, oh, babeli bazalaki wana minei to mitano, bazalaki kobunda na liwa, apesaki bango kaka mwa bangonga, pe Molimo Mosantu abikisaki bango. Monganga azalaki kotiela yango ntembe. Alobaki: “Ndenge nini ekoki kosalema boye? Tala,” alobaki, “na—na . . . Azali mobeli na ngai.”

124 Nalobaki: “Azalaki. Kasi sikawa akómi ya Nzambe. Ye—ye, akómi sikawa moto na Ye.” Bomoni?

125 Na bongo bomoni likambo yango, ezali ete Nzambe azali kobenga bato na esode, ete babima kati na ezipeli ya mosuni oyo ezali koluka komekola, koluka kokota na lingomba; ba-Methodiste, ba-Batiste, ba-Presbiterien, bango nyonso te, kasi mangomba ya ba-Pantekotiste. Ezali likambo ya moto na moto. Ezali yo na Nzambe. Yo nde osengeli kokota, etonga na bino te, lingomba na bino te, mokengeli na bino te, kasi yo nde osengeli kokota.

126 Nakolinga ete bomona lolenge mosusu ya Mose, ntango abimaki. Ata azalaki mosakoli, ata azalaki moto monene ndenge wana, ntango ayaki na Liloba, bato bamonaki ete abongwani. Likambo moko ekómelaki ye. Ntango ayaki na Liloba oyo etatolami ya eleko wana, mibeko, akómaki moto oyo abongwani.

127 Yo pe okokóma bongo, ntango okobima na ezipeli ya bomoto oyo esalaka ete moto átiola mayangani ya boye; ete moto ábeta libaku na Lobiko na nzoto kouta na Nzambe, pe áloba ete eleko ya bikamwa esila koleka. Soki obimi na ezipeli wana ya bomoto, ezipeli ya mimesano, nde moto nyonso akoyeba ete likambo moko ekómeli yo.

128 Lokola ndeko na biso ya lokumu, Jim Brown. Nabanzi ete ba-Presbiterien mingi bayebi ete likambo moko ekómeli ye, mpo ete a—abimi na ezipeli ya mimesano. Amonaki eloko moko, kati na bato, oyo ebendaki ye, pe abimaki na ezipeli yango.

129 Ee, yo, ntango okobima na ezipeli, okomonana polele na miso ya bato na ntango wana, na lolenge ete bakomona ete likambo moko ekómeli yo. Liloba oyo ezipami, liboso na mozangi kondima, kasi emonani polele na mondimi. “Yesu Klisto, motindo moko lobi, lelo, pe libela.”

130 Na ntango oyo kuna, ezalaki Nzambe. Na mikolo yango, ezalaki Nzambe kati na Moto moko, Mwana na Ye, Yesu Klisto. Tondimi yango. Azalaki kaka mosakoli te, kaka mobali lokola mibali nyonso te, moto lokola bato nyonso te. Ezalaki nde Nzambe kati na Klisto; Nzambe kati na Moto moko; litondi ya Bozambe, na nzoto ya Moto moko. Nzambe kati na Moto moko!

131 Sikawa ekómi Nzambe kati na bato, litondi ya Nzambe kati na Bonzambe, na nzoto, kati na Lingomba na Ye mobimba, komimonisa Ye moko, kokokisa Liloba na Ye.

¹³² Sikawa tomomi ete Nzambe, na bileko nyonso, alataka mposo. Ye, Nzambe, abombanaka na nsima na ezipeli.

¹³³ Ezali mpenza kokanisela ngai mwa—mwa lisolo moko oyo esalemaki kuna na Súdi. Na bongo libota moko ya Baklisto ezalaki kuna. Pe kati na libota yango ya Baklisto, bazalaki kondimela Nzambe, pe ba—bazalaki kokanisa ete—ete Nzambe azalaki kobatela bango na mikakatano nyonso. Pe, ya solo, Abatelaka. Pe bazalaki na mwa elenge moko, mwa elenge mobali ya mibu pene na nsambo to mwambe. Pe—pe azalaki kokende na eteyelo ya lomingo pe azalaki mwa elenge moko malamumu. Kasi na ntango ya mopepe makasi, mingi mpenza ntango mikalikali ezalaki kosala, azalaki kobanga mingi.

¹³⁴ Pe, mokolo wana, nabetelaki mobali moko lisolo oyo, ntango nsango ya moto oyo abikisamaki epanzanaki. Kaka motei yango alobaki: “Bazali kokómisa yo nzambe, Ndeko Branham.”

¹³⁵ Ee, azalaki motélemeli, na bongo nakanisaki ete nakokaki bobele kokata lisolo yango, na mokuse. Mpo na kozokisa motema te, bomoni, kasi kaka mwa . . . Nalobaki: “Kozala nzambe, ezali mpenza mosika mingi na Makomi?” Bomoni? Nalobaki: “Te, ezali bongo te,” nalobaki, “mpo ete Yesu abengaki basakoli ‘banzambe.’ Bomoni? Ezali ya solo, ‘Nzambe.’”

¹³⁶ Pe balobaka: “Ee, bino bozali komeka kozua esika ya Nzambe.” Ezali mpenza mosika mingi te. Ezali mpenza bongo. Yango mpenza. Nzambe amonisami na mosuni, kaka ndenge Alakaki.

¹³⁷ Bongo, libota moke yango. Nalobelaki ye mwa lisolo yango, oyo ekómelaki ngai na makanisi kaka na ntango wana. Ete, mokolo moko na butu, mopepe makasi eyaki, pe mama alobaki na Junior, alobaki: “Sikawa, matá na likolo, mwana, kende kolala.”

Alobaki: “Mama, nazali kobanga,” alobaki bongo.

“Eloko moko te ekosala yo mabe. Matá na likolo pe kende kolala.”

¹³⁸ Elenge yango alalaki kuna na likolo, pe mikalikali ezalaki kongenga na maninisa. Pe mwana yango akómaki mpenza motema likolo, abombaki motó na ye na nse ya bolangiti, kasi azalaki kaka koyoka mi—mikalikali, to komona mikalikali kongenga na maninisa, pe—pe koyoka nkake konguluma. Na bongo alobaki: “Mama!”

Pe alobaki: “Olingi nini, mwana?”

Alobaki: “Matá awa kolala elongo na ngai.”

¹³⁹ Na bongo amataki na bibuteli, lokola mama nyonso ya malamumu, ya sembo. Amataki, pe amemaki mwana na maboko na ye. Pe alobaki: “Mwana, mama alingi kosolola na yo mwa moke.”

Alobaki: “Malamumu, mama.”

140 Alobaki: “Sikawa kobosana likambo oyo te. Tokendeke losambo, ntango nyonso. Totangaka Biblia. Tobondelaka. Tozali libota ya Baklisto. Tondimeli Nzambe.” Pe alobaki: “Tondimaka ete, na ntango ya mopepe makasi pe ya makambo nyonso, Nzambe azali mobateli na biso.”

141 Alobaki: “Mama, nandimaka nyonso wana. Kasi,” alobaki, “ntango mikalikali yango ekómi mpenza pembeni boye,” alobaki, “nalingi Nzambe oyo alati mposo.”

142 Boye, na—nakanisi, ezali kaka mpo na mwana wana te, kasi ezali pe bongo mpo na biso nyonso. Ntango tosonianaka, ntango tobondelaka bamoko mpo na bamosusu, ezali Nzambe alati mposo.

143 Pe tomoni awa ete Nzambe alataka ntango nyonso mposo. Ntango Mose amonaki Ye, Alataki mposo, Azalaki lokola Moto. Ntango Nzambe azalaki na nsima ya baridó, Alataki mposo. Pe Nzambe, na mpokwa oyo, kati na Lingomba na Ye, Azipami na mposo kati na Lingomba na Ye. Azali kaka Nzambe yango moko, na mpokwa oyo. Tomoni yango.

144 Kasi sikawa, lokola ntango nyonso, ezipeli ya mposo nde ekangaka mimesano. Bakoki ata kondima te ete Nzambe nde azali kosalisa bato yango makambo ya boye. Bomoni? Ezali mpo ete Nzambe azipami kati na Lingomba na Ye, kati na mposo, alati mposo. Ya solo. Abombami na miso na mozangi kondima, pe Amonisami epai na mondimi. Iyo, misie.

145 Sikawa, ntango ezipeli na bango ya mimesano, mimesano ya bankoko, ntango Liloba efungolaki nzela, oh, ya solo, lelo, na ntango yango nde emonani polele, tomoni Ye, Bonzambe ezipami lisusu kati na mosuni ya moto. Baebele 1 elobi bongo.

146 Pe lisusu Genese 18. Bomikanisela, Nzambe azalaki Moto ntango azalaki wana, Aliaki, pe Asololaki na Abalayama, pe Alobaki likambo Sara azalaki kosala kati na hema nsima na Ye.

147 Pe Yesu alobaki: “Pelamoko na mikolo na Sodoma, ekozala bongo na Boyei ya Mwana na moto.” Bonzambe ezipami lisusu kati na mosuni ya moto! Sikawa, bomikanisela, Yesu alobaki te: “Ntango Mwana na Nzambe akomonisama.” Na Luka mokapo ya 17, nabanzi, pene na molongo ya 20, 21, penepene na yango, Alobaki: “Ntango Mwana na moto akomonisama.” Mwana na moto, azongi lisusu kati na—na—na Lingomba, amonisami kati na bato; Mwana na Nzambe te, kasi Mwana na moto lisusu, azongi lisusu kati na Lingomba na Ye, na mikolo ya suka. Tomoni ete Alakaki yango kati na bilaka na Nzambe.

148 Tomoni eloko mosusu, kati na Kondimana na Kala. Nazali na Likomi yango awa, na Esode. Bamposo yango ya kala ya gambala ezalaki kosala nini? Ezalaki kobomba Nkembo na Nzambe na miso na bato. Bamposo ya gambala; bato bakokaki ata komona Yango te, mpo ete mposo moko nde ezalaki kobomba

Yango. Mposo ezalaki . . . Nkembo na Nzambe ezalaki nsima na mposo yango.

149 Pe sikawa Nkembo na Nzambe ezali nsima na mposo na yo. Ya solo. Pe mimesano ezali komona Yango te. Ezali na kati ya ezipeli, esika Liloba na Ye ezalaki.

150 Eloko nini ezalaki kati na mposo yango kalakala, bamposo wana ya kala ya gambala?

151 Mpo ete: “Ezalaki na bonzenga te ete tolinga Yango. Pe ntango Ekómaki mosuni pe Efundaki kati na biso, Ezalaki kaka na bonzenga te ete tolinga Yango.”

152 Pe sikawa ezali ndenge moko lelo. Eloko moko te ezali kati na mobali to mwasi, oyo moto akoki kolinga. Ezali nde oyo ezali kuna na nsima. Ezali nde yango. “Bongo,” okoki koloba, “mobali wana, nayebi ete azaláká molangwi masanga. Azaláká kosala *boye*.” Oyo azaláká kosala etali ngai te. Nini ebombami na nsima ya mposo wana? Eloko oyo ezali kuna na nsima, yango nde ezali na motuya. Yango nde, bato bakufi miso. Mposo ezali koboma bato miso. Bomoni? Bato balobaka: “Nabosani te ntango mwasi wana azaláká kosala bongo.” Nayebi oyo azaláká kosala, kasi mpo na sikawa olobi nini? Bomoni?

153 Bamposo yango, oyo ezaláká kala likolo na gambala, kasi sikawa ekómi kobomba Nkembo na Nzambe, ekómi efandelo na Yango. Ezaláká likolo na nyama, kasi sikawa ekómi efandelo ya Nkembo na Nzambe.

154 Ndenge moko pe mposo na yo ekoki kobongwana, na mpokwa oyo, ete ékóma efandelo ya Nzambe, Nzambe kofanda kati na moto.

155 Botala. Bamposo yango ya kala ya gambala, tomoni ete na nsima na yango. . . Liloba ezalaki kuna na kati. Pe, Liloba, lipa ya libonza pe ezalaki kuna. Sanduku pe emwangisamaki. Pe ezalaki nini? Nkembo na Shekinah ezalaki kuna na kati.

156 Bongo, Liloba ezali Momboto, pe ekoki kobota te so—soki Mwana naino angengeli Yango te. Mwana asengeli kozala likolo na Momboto, mpo na kobotisa Yango, mpo na kotoisa Yango. Pe nzela mosusu ezali te. Yo zua nde Liloba, omoni, zua Liloba na Nzambe kati na motema na yo, pe kota kati na Nkembo ya Shekinah. Na ntango wana, Ekopesa lipa ya libonza, Mána, oyo epesamaka bobele na bato oyo batiami pembeni. Baoyo bakoki kolia yango, oyo bazui ndingisa ya kolia yango, ezali kaka bato oyo bazui ndingisa pe bayebi Yango. Polo alobaki awa: “Tokobongwana longwa na Nkembo moko kino na Nkembo mosusu.” Bomoni, na suka, ekosalema ete Ekozongela Nkembo na Yango ya ebandeli.

157 Ezali mpenza lokola momboto ya felele ya belle-de-jour. Soki momboto ya felele ekwei na mabele. Soki momboto ya lisangu ekwei na mabele. Eloko nini ekosalema liboso? Ekobima,

pe ekobimisa mwa litíti. Na nsima ekómi motó ya lisangu. Na nsima, uta na motó ya lisangu, ezongi na mbuma na yango ya ebandeli.

¹⁵⁸ Ee, yango mpenza nde eloko esalemi na Lingomba. Eutaki na Luther, eleki na Wesley, pe sikawa ezongi na Mbuma ya ebandeli, ezongi na Nkembo na Yango ya ebandeli, ezongi na Nkembo oyo Ezalaki na ebandeli. Mwana oyo abimaki na ebimelo na ntango, bobele Mwana yango azali komonisa likambo yango moko na elimwelo na ntango, kobongwana longwa na Nkembo moko kino na Nkembo mosusu. Ebongwanaki longwa na bopagano, kino na Luther; pe longwa na Luther, kino na Wesley; longwa na Wesley, kino kokota na Pantekote; pe bongo na bongo, kobongwana longwa na Nkembo moko kino na Nkembo mosusu, kobimisa Mána oyo ebómbámá.

¹⁵⁹ Pe sikawa Ekoméí, mpo na kozongisa Ye, mpenza ndenge Azalaki na ebandeli, mosala na Ye moko wana; Yesu moko wana, nguya moko wana, Molimo Mosantu moko wana. Bobele Ye oyo akitaki Mokolo ya Pantekote, ezali kaka Molimo Mosantu yango oyo azali komimonisa lelo, longwa na Nkembo moko kino na Nkembo mosusu, kino na Nkembo mosusu. Pe Ezongi na Momboto na Yango ya ebandeli, ná libatisi ya Molimo Mosantu; ná bilembo yango moko, bikamwa yango moko, libatisi yango moko; motindo yango moko ya bato, oyo bazali kosala ndenge moko, na nguya yango moko, bobele koningana yango. Ezali longwa na Nkembo moko kino na Nkembo mosusu. Pe oyo ya nsima ekozala: “Kobongwana longwa na Nkembo oyo, kokota na nzoto lokola nzoto na Ye Moko ya Nkembo, kati na yango tokomona Ye.” Abalayama pe amonaki bongo.

¹⁶⁰ Sikawa botala. Tomoni ndenge ebongwanaki. Kobanda na Gologota, tobengami ete tózua eteni ya Nkembo na Ye. Sikawa, na Bakolinti ya Liboso 12: “Tobatisami kati na Nzoto na Ye. Biso nyonso tobatisami kati na Molimo moko.” Kati na “mai” moko te. “Molimo moko, biso nyonso tobatisami.” Ya solo, bongo, na nsima nde tokómi eteni na Ye.

¹⁶¹ Nakanisi ete nazali koumisa bino ntango molai te. [Losambo balobi: “Te.”—N.D.E.] Bomoni? Nakanisi ete ezali bongo te.

¹⁶² Kasi, ezali mpenza lokola miziki kitoko oyo ezali kobetama, to oyo ezali kobeta elongo na lisano ya teátre.

¹⁶³ Nayebi makambo ya miziki to ya teátre malamú mpenza te. Kasi nazalaki kotala lisano oyo. . . nazalaki koloba na ntina na *Carmen*, oyo mwana na ngai ya mwasi ná bamosusu bazalaki kati na yango. Pe ba—pe bazalaki kosala teátre, kolandana na miziki, *Carmen*. Bazalaki kosala teátre. Miziki yango pe ezalaki ko—ko—kobeta kolandana na teátre.

¹⁶⁴ Ezalaka pe bongo ntango bato babatisamaka na Molimo Mosantu, kati na Klisto.

¹⁶⁵ Sikawa, bomoni, mingi na kati na bino basila kotanga to koyoka lisolo ya mosali-nzembo monene ya Russie oyo ayembaki *Petelo Ná Mbwa Ya Zamba*. Pe ndenge ye, bazalaki kosala teátre yango na bilembo pe nyonso. Pe moto nyonso oyo ayebi lisolo yango, oyo azali kotanga yango na lokasa, pe azali koyoka miziki yango, ndenge bazalaki kosala teátre yango, ndenge ezali kolandana, solo, akoyeba mbongwana nyonso. Akoki kotala yango *awa*, pe komona mbongwana.

¹⁶⁶ Kasi, sikawa, nini esalemaka soki—soki mosali-nzembo akomí eloko moko, pe tomoni ete etalisami na teátre malamú te? Na ntango wana tokomóna ete likambo moko ekosalema. Eloko moko ezangi, ntango tomoni bango. Moto oyo asalaki yango abongisaki pe akomaki yango, pe na nsima, ntango miziki oyo ezali kobeta yango, eyembi yango mabe. Likambo moko etamboli malamú te. Moyembisi akambi malamú te. Bomoni?

¹⁶⁷ Pe yango nde ezali kosalema lelo, bandeko na ngai ba-Lutherien, bandeko na ngai ba-Batiste, bandeko na ngai ba-Pantekotiste. Bandeko na ngai nyonso ya bibongiseli ndenge na ndenge, likambo nde yango wana. Bomoni? Bozali komeka kotinda nzembo ndenge ebetamaki na eleko ya Luther, ya Wesley, ndenge wana, na ntango oyo, na ntembe te, Lokasa ya miziki awa ezali kotalisa ete ekómi eleko mosusu. Bomoni? Bomoni? Bomoni? Tokoki kobika na pole ya Luther te; ye azalaki mobongisi. Tosepeli na—na eteni na ye ya miziki, kasi tosili tobeti yango esili. Tokómi sikawa epai *boye*, na suka mpenza ya Buku. Bomoni? Tokoki te—tokoki te kobeta Yango ndenge wana.

¹⁶⁸ Sikawa, nzela bobele moko oyo bokoki kosala yango, bandeko na ngai, yango oyo. Pe na bandeko ya mokili mobimba, ya bisika ndenge na ndenge kati na mokili, nakoki koloba, ndenge ya kosala ezali bobele moko mpo na—mpo na moyembisi yango. Asengeli kokota kati na Molimo yango moko oyo mosali-nzembo azalaki kati na Yango, na ntango wana nde azui Yango. Pe ntango Lingomba, miziki Yango moko, na ntango oyo mokili ezali kozela na bokebi bilembo pe bikamwa; ntango Lingomba, Mosali-nzembo, ná moyembisi, bango nyonso bakoti kati na Molimo ya Mosali-nzembo.

¹⁶⁹ Na ntango wana soki balobi: “Eleko ya bikamwa esilá koleka,” ekoyokana malamú te.

¹⁷⁰ Kasi soki ekoti na etamboli mpenza ya nzembo Yango, pe na Molimo Yango mpenza; ekosalema ndenge nini soki Molimo ya Mosali-nzembo ekiti te? Amen. Na ntango wana, soki olobi: “Ntango ya bikamwa eleki naino te.” Miziki ekoganga: “Amen.” Soki tokómi na esika oyo elobi: “Yesu Klisto, motindo moko, lobi, lelo, pe libela.” Miziki ekoganga: “Amen.” “Bokozua nguya, wana ekosila Molimo Mosantu koya likolo na bino.” Miziki ekoganga: “Amen. Nazali na Yango.” Na ntango wana ekozala lisusu makambo ya kobanzabanza te. Miziki yango mobimba

ekómi mpenza na boyokani ná Liloba. Ekobeta... [Ndeko Branham abeti maboko na ye mbala misato—N.D.E.] Boye. Oh! Ezali likambo monene. Moyembisi ná Mosali-nzembo basengeli kozala kati na Molimo moko. Ndenge moko pe esengeli ete babeti nzenze bazala kati na Molimo yango moko, mpo ete mobimba na Yango ebetama malamau. Pe mokili ezali komituna likambo nini ezali kosalema.

¹⁷¹ Comunisme oyo bazali kolobela, pe balembisi ngai na likambo yango, ná makambo nyonso oyo etali bosangani pe nyonso wana, ná bokabwani. Oh, mawa! Boye, bozoba nyonso oyo, na ntango oyo Boyei na Nkolo ekómi pene, eloko moko ezali koyokana malamau te. Nazali kobanga ete moyembisi... Bayembisi basila kobima na Molimo ya Mosali-nzembo.

¹⁷² Soki tozui Molimo ya Mosali-nzembo wana, nguya na Nzambe ya ebandeli oyo Biblia elobi: “Bato ya kala bapusamaki na Molimo Mosantu mpo na kokoma Biblia oyo,” nde bokomona ete biteni nyonso mibale ya lokasa ya ba-Chinwá ekokutana, kaka ndenge Biblia ya Nzambe ná mondimi bakokutana, mpo ete bango nyonso mibale bazali kati na Molimo moko. Bango nyonso mibale bakokani. Basangani malamau mpenza elongo. Eloko tosengeli na yango lelo ezali nde bayembisi, ezali ya solo, ete bazonga na Liloba, bazonga pe bandima Yango kaka ndenge Elobi. Na ntango wana nde bokomona Nzambe, Ye moko. Yango nde kozipolama. Teatre ekómi likambo ya solo.

¹⁷³ Lelo, bato balobaka: “Tala, Azali Nzambe ya kalakala. Toyebi ete Akatisáká Mbu Motane. Asáláká nyonso oyo. Pe Azaláká kati na—na libeke na móto, elongo na bana na Baebele.” Litómba ya Nzambe ya kalakala ezali nini, boye te, soki lelo Azali ndenge moko te? Bato bakumisaka Nzambe ntango nyonso na ntina na oyo Asila mpenza kosala, bakanisaka oyo Akosala, kasi bazali koyeba te makambo Azali kosala. Ezali ndenge ya moto ete ásálaka bongo. Pe ezali ndenge moko lelo, bandeko na ngai. Ezali mpenza ndenge moko. Hólalá!

¹⁷⁴ Tozonga nsima pe tosala ete miziki ébeta malamau, mpo bato ya mokili bamona. Yesu alobaki: “Soko Nakonetolama na mokili, Nakobenda bato nyonso epai na Ngai moko.” Pe, “Azali motindo moko lobi, lelo, pe libela.”

¹⁷⁵ Tika ete bayembisi bakota kati na Molimo ya malamau, elongo na babeti-nzenze ná Mosali-nzembo, pe nyonso ekotambola malamau. Na ntango wana nde, kobanzabanza ekozala lisusu te, na ntango wana tomikokanisi na Ye. Baebele 13:8 elobi: “Azali motindo moko lobi, lelo pe libela.”

¹⁷⁶ Tomikokanisi na Ye kati na Misala 2. Tomikokanisi na bango, na libatisi moko, ndenge moko. Nyonso oyo Azaláká kalakala pe nyonso oyo Azali, nyonso oyo Azaláká pe nyonso oyo Azali, yango nde biso tozali. Yango mpenza.

¹⁷⁷ Ndenge moko soki nalingi kozala moto na Amerika ya solo, nasengeli komikokanisa na makambo nyonso oyo yango ezaláká, na nyonso oyo yango ezali. Esengeli ete namikokanisa na yango, soki nazali moto na Amerika ya solo.

¹⁷⁸ Soki nazali moto na Amerika ya solo, boye nakómaki na Plymouth Rock. Amen. Ezali bongo, soki nazali moto na Amerika. Bino pe; bokómaki na Plymouth Rock elongo na batata oyo bazalaki na mobembo. Na Plymouth Rock, ntango bakómaki wana, nazalaki elongo na bango; Bino pe, biso nyonso.

¹⁷⁹ Natambolaki na mpunda elongo na Paul Revere, na nzela, mpo na kokebisa bato na makama nyonso. Ezali mpenza ya solo.

¹⁸⁰ Awa na Valley Forge, nakatisaki ebale ya Delaware ntango ekómaki glas, elongo na mampinga ya basoda oyo, ndambo kati na bango, bazalaki ata na sapato na makolo te. Liboso na yango, nabondelaki butu mobimba elongo na George Washington. Nakatisaki ebale ya Delaware na emononeli moko na motema na ngai. Tozali bato na Amerika. Iyo, misie. Na Valley Forge, nasalaki yango solo.

¹⁸¹ Nazongisaki matondi elongo na batata na fėti ya liboso ya Kozongisa matondi. Nazongisaki matondi epai na Nzambe. Soki nazali moto na Amerika ya solo, natalisamaki kuna na mesa yango.

¹⁸² Soki nazali moto na Amerika ya solo, natalisamaki ntango natelemaki elongo na Stonewall Jackon.

¹⁸³ Soki nazali moto na Amerika ya solo, natalisamaki na Boston Tea party, iyo misie, ntango toboyaki ete bakosa biso. Bongo, nakokani mpenza na Amerika. Natalisamaki kuna elongo na yango. Iyo, misie. Hólalá!

¹⁸⁴ Nabetaki Ngonga ya Bonsomi, na mokolo ya 4 oyo ya liboso na sanza ya nsambo, na mobu 1776. Nabetaki Ngonga ya Bonsomi awa pe nayebisaki bato ete tozui lipanda. Mpo na kozala moto na Amerika ya solo, nasengelaki kosala yango.

¹⁸⁵ Nasanganaki na nsoni na ye na ntango ya Revolisió, na ntango oyo bandeko mibali bazalaki kobunda. Nasengeli kolata nsoni na ye, ndenge moko pe nasengeli kolata nkembo na ye. Soki nazali moto na Amerika, nasengeli kozala bongo. Natalisamaki elongo na ye. Iyo, misie.

¹⁸⁶ Natalisamaki kuna na Gettysburg, ntango Lincoln apesaki lísikúlu na ye. Iyo, misie.

¹⁸⁷ Nazalaki na Wake Island, likolo na bibembe ya basoda oyo ezalaki kobimisa makila. Natelemaki na Wake Island.

Na Guam, nasungaki mpo na kotombola bendele.

¹⁸⁸ Nazali moto na Amerika ya solo. Amen. Nyonso oyo Amerika azali, yango nde ngai nazali, pe nazali na lofundu mpo na yango. Iyo, na ntembe te. Nyonso oyo Amerika azalaki, nyonso oyo

Azali, kaka yango nde ngai nazali, mpo na kozala moto na Amerika. Nyonso oyo Azalaki, nasengeli kozala yango, mpo ete namikokanisi na yango.

¹⁸⁹ Ndenge moko, mpo na kozala Moklisto ya solo, osengeli komikokanisa na yango.

¹⁹⁰ Nateyáká elongo na Mose, pe nake- . . . to elongo na Noa, pe nakebisáká bato na ntina na kosambisama oyo elingaki koya; mpo na kozala Moklisto ya solo.

¹⁹¹ Nazalaki elongo na Mose na nzete ekopela móto. Namonaki Likonzi na Móto. Namonaki Nkembo na Ye. Nazalaki elongo na Mose kuna na biliki, mpo na kozala Moklisto. Nasengeli komikokanisa na nyonso oyo Nzambe azalaki, mpo na kozala Moklisto. Namonaki nkembo na Ye. Nayokaki Mongongo na Ye. Sikawa komeka te komema makanisi na ngai mosika, na nzela na ndimbola na yo, mpamba te nazalaki wana. Nayebi eloko nazali koloba. Namonaki likambo oyo esalemaki. Iyo, misie.

¹⁹² Nazalaki na Mbu Motane, ntango namonaki Molimo na Nzambe kokita pe kopasola mai; bakatisaki lisobe ya nkékélé te, ndenge bato bazali komeka koloba lelo, kasi mbu ya bozindo ya pied ntuku libwa [métele ntuku misato—N.D.T.]. Namonaki Molimo na Nzambe. Natambolaki elongo na Mose likolo na mabele oyo ekauki, mpo na kokatisa Mbu Motane wana.

¹⁹³ Nazalaki liboso na Ngomba Sinai pe namonaki nkake ná mikalikali kokita. Naliaki Mána elongo na bango kuna. Namelaki mai oyo ebimaki na Libanga wana. Nazali kokoba komela yango na mpokwa oyo. Natalisamaki elongo na baoyo baliaki Mána. Natalisamaki elongo na baoyo bamelaki mai oyo ebimaki na Libanga.

¹⁹⁴ Natalisamaki pe ntango Yosua ayulaki kelelo, pe bitutu ya Yeliko ekweaki.

Nazalaki kati na libulu na nkosi elongo na Daniele.

Nazalaki kati na libeke na móto elongo na bana na Baebele.

Nazalaki na Ngomba . . . elongo na Eliya likolo na Ngomba Karmel.

¹⁹⁵ Nazalaki elongo na Yoane Mobatisi, liboso na batélemeli wana. Namonaki Molimo na Nzambe kokita. Nayokaki Mongongo na Nzambe koloba: “Oyo azali Mwana na Ngai na bolingo, kati na Ye nde Nasepeli kofanda.” Iyo, misie. Na ntembe te natalisamaki elongo na ye. Ezali mpenza ya solo.

¹⁹⁶ Natalisamaki kuna na nkunda ya Lazalo, ntango Asekwisaki Lazalo. Natalisamaki, mwasi wana na liziba, ntango Ayebisaki ye masumu na ye. Iyo misie.

¹⁹⁷ Na ntembe te natalisamaki elongo na Ye na liwa na Ye. Pe natalisamaki na Pasika ya liboso. Nasekwaki kati na bakufi elongo na Ye. Natalisamaki elongo na Ye na liwa na Ye.

¹⁹⁸ Nazalaki elongo na bato mokama na ntuku mibale, na eteni ya likolo. Natalisamaki kuna elongo na bango. Hey! Na—namiyoki mpenza mosambeli. Hólalá! Natalisamaki kuna. Nazali moko kati na bango. Natalisamaki. Nabikeli lobiko ndenge moko lokola bango. Nazalaki wana ntango yango esalemaki, mpo na kozala Moklisto ya solo. Nazalaki nzeneneke ya Mopepe makasi oyo eyaki. Nazalaki nzeneneke na yango. Nayokaki nguya na Nzambe ndenge Ezalaki koningisa. Nazalaki elongo na baoyo balobaki minoko na sika. Nayokaki epakweli kokota kuna. Nazalaki elongo na bango. Natalisamaki elongo na bango ntango Molimo Mosantu abandaki koloba na nzela na minoko na sika, elongo na bango.

¹⁹⁹ Nazalaki elongo na Petelo, liboso na batélemeli kati na Misala 2, ntango ateyaki liteya monene wana. Natalisamaki kuna elongo na ye. Iyo, misie.

²⁰⁰ Na Misala 4, ntango bayanganaki, nazalaki elongo na bango ntango ndako eninganaki. Nsima na liyangani ya mabondeli, ndako eninganaki esika bafanadaki. Natalisamaki kuna elongo na bango.

Nateyaki elongo na Polo na Areopáje. Iyo, misie.

²⁰¹ Nazalaki elongo na Yoane na Esanga ya Patamo, pe namonaki Boyei na Ye ya mibale.

Nazalaki elongo na Luther na ntango ya kobongisa makambo.

²⁰² Nazalaki elongo na Wesley, lokoni ya móto wana; oyo ekamatamaki na móto, na ntango ya botomboki monene kotelemela lingomba ya Anglikani. Nazalaki kuna elongo na ye.

²⁰³ Pe ngai oyo na mpokwa oyo, na mobu 1964, na Philadelphie, Pennsylvanie, natalisami elongo na etonga ya lolenge yango moko, toleki na lobiko ya lolenge yango moko. Nasengeli kozala bongo, mpo na kozala Moklisto. Nasengeli koumela kotalisama esika Liloba na Nzambe ezali komonisama. Natalisami elongo na etonga oyo bazali koyoka Molimo na Nzambe.

²⁰⁴ Natalisami elongo na etonga oyo bayebi ete Azipolami, oyo bayebi ete Azali motindo moko lobi, lelo, pe libela, oyo bayebi ete Oyo ezali likambo ya bilandalanda te. “Ezali Yesu Klisto, motindo moko lobi, lelo, pe libela.” Natalisami elongo na etonga yango awa, na mpokwa oyo. Atako, babengaka bango etonga ya bapengwi, atako ezali etonga ya bilandalanda, na ntina na Liloba na Nzambe. Kasi, “nayoki Nsango Malamu na Yesu Klisto nsoni te, mpo ete Yango ezali nguya na Nzambe mpo na kobikisa,” pe nazali moko na bango. Nazali elongo na mikanda na bomoi wana, oyo nalobelaki, oyo etatolami, Nzambe oyo azipami kati na lolenge ya bato, kati na mibali pe basi. Oh!

²⁰⁵ Nzambe kati na *en morphe* na Ye lisusu, Amizipoli pe Amimonisi epai na bato na Ye. Mokonzi monene Oyo atiaki

Nkembo na Ye pembeni. “Nsima na mwa ntango moke, bamokili bakomona Ngai lisusu te. Nakozipama na miso na bango. Kasi bino bokomona Ngai, mpo ete Nakozala elongo na bino, ata kati na bino, ntango nyonso kino suka na ekeke, kobongwana longwa na Luther kino na Wesley, bongo na bongo, longwa na Nkembo moko kino na Nkembo mosusu. Nazali bobele Nzambe yango oyo azali na bomoi, pe Nazali kozonga na Nkembo ya ebandeli.” Aleluya!

²⁰⁶ Apasoli bizipeli nyonso ya bibongiseli, bitutu nyonso ya lokito. Lokito wana oyo elobi: “Oh, oyo wana ezali bilandalanda,” Akatisi yango mbala moko. Lokito oyo ebimaki kuna, elobaki: “Oh, bato wana bazali maboma,” Akatisaki ezipeli yango mbala moko. Iyo, Asali bongo. “Oh, bokokoka te. Bozali bobele etonga ya bilandalanda.” Akatisaki yango mbala moko. “Lobiko na nzoto kouta na Nzambe ezalaka te.” Akatisaki yango mbala moko, Hólalá, mpo ete Liloba na Ye elobaki ete Akosala yango. Moto akoki kolonga Liloba na Nzambe te.

²⁰⁷ Pe Ye wana, ata bongo, na mpokwa oyo, Molongi na nguya, mpo ete Akatisi ezipeli ya ba-Methodiste, ba-Batiste, ba-Presbiterien, pe lolenge mosusu nyonso ya ezipeli. Azali naino kati na bato na Ye, na mpokwa oyo, mimesano elongi Ye te. Bato báloba oyo balingi, básala oyo balingi, nyonso oyo balingi. Nzambe akoya, Akokatisa etutu yango ya lokito.

²⁰⁸ Pe bomikanisela, bayebisaki ngai ete, soki mpepo ekatisi mpenza etutu yango ya lokito, mbangu na yango ezalaka lisusu na ndelo te.

²⁰⁹ Nazali koyebisa bino, soki bokatisi epekiselo wana ya mimesano, oyo elobaka ete “Yesu atikálá kuna na nsima, pe lelo Azali te,” na ntango oyo bozali komona ete Azali motindo moko lobi, lelo, pe libela, ndelo ezali te na oyo Nzambe akoki kosala awa kati na likita oyo, pe kolakisa na mokili oyo eloko nini basengeli na yango: limpáti ya mokili mobimba te, kasi kolamuka ya mokili mobimba, ete étóndisama pe ébátisama na Bozali ya Nzambe na bomoi, *en morphe* oyo Amizipi kati na mosuni ya moto. Aleluya! Nandimi yango.

²¹⁰ Akatisi bipekiselo nyonso, bizipeli nyonso, bizipeli nyonso! Eloko moko te ekoki kobomba Bozali na Ye. Soki bato bakómi koyoka mposa na mitema na bango, ezipeli moko ebelemi mpo ete bakatisa yango. Bokoki mpenza kotiela yango motema. Apasoli bizipeli nyonso, na nzela na Molimo Mosantu na Ye ya nkembo!

²¹¹ Pe Azali awa, na mpokwa oyo, Molongi na nguya, motindo moko lobi, lelo, pe libela; Azali kobikisa babeli, kobatisa bandimi, kaka ndenge Asalaka ntango nyonso. Azali Molongi na nguya. Milimo mabe oyo bakweisami bazali kopalangana. Iyo, misie. Bapalanganaka ntango nyonso, ntango Ye ayáka.

²¹² Mpo na kosukisa, nakoki koloba boye. Ezalaki . . . Natangaki lisolo moko, eleki mibu ebele, na ntina na mobange moko mobeti na violon. Azalaki na violon moko ya kala oyo balobaki na ye ete basomba. Bosila koyoka lisolo yango, mbala na mbala. Pe balingaki koteka yango na ntalo moko boye. Pe moteki yango alobaki: “Nani alingi kopesa ngai motuya *boye*?” Nakanisi ete balobaki na ye ete basomba yango na mwa mbongo ya mábende, ntango mosusu meya ntuku mitano, to ntalo moko boye. “Mbala moko, mbala mibale, . . .”

²¹³ Na pwasa, mobali moko atelemaki kuna na nsima. Alobaki: “Bozela mwa moke.” Apusanaki pe azuaki yango. Tokanisa ete abetaki nzembo oyo:

Liziba moko ezali oyo etondi na Makila,
Oyo ekamatami na misisa ya Emanuele;
Soki basumuki bamibwaki kati na yango,
Mbindo ya mabe na bango ekolongwa.

²¹⁴ Na nsima, ntango akitisaki yango, ata liso moko te ezangaki kotangisa mpisoli na esika wana. Bongo alobaki: “Nani akopesa ntalo?”

²¹⁵ Moto moko alobaki: “Nkoto mitano. Nkoto zomi.” Ezalaki lisusu na ntalo te. Mpo na nini? Nga—nganga na violon autaki komonisa motuya na yango ya solosolo.

²¹⁶ Oh, ndeko mobali, ndeko mwasi, sikawa tika ete Nkolo na Liloba oyo, Ye oyo akomaki Yango, Molimo Mosantu ya nkembo, apakola bolingo na litimbo na Ye, pe alekisa yango na motema na yo.

Liziba moko ezali oyo etondi na Makila,
Oyo ekamatami na misisa ya Emanuele.

²¹⁷ Bokomona motuya na yango mobimba, pe bokomona polele Nzambe oyo azipolami. Ete, Azali ndenge moko lokola Azalaki na Mokolo ya Pantekote, ntango Akitaki likolo na bato, ntango Amisopaki, *kenos*, “Amisopaki” mbala moko kati na Bango. Ya solo.

²¹⁸ Okoloba: “Ndeko Branham, nameká. Nameká. Nasálá *boye*, *boye*, na *boye*.”

²¹⁹ Mokolo moko nazalaki kokamba liyangani moko na Carlsbad, na New Mexico. Bongo, tokendeki kuna kotala libulu monene ya kala ya bangembo. Esika yango ezalaki kopesa mwa nsomo, pe tokitaki kuna. Pe mo—mobali yango, ntango akitaki kuna na esika yango, a—abomaki minda na pwasa. Pe, Hólalá, bokoki komikanisela ndenge ezalaki molili. Ezalaki kaka. . . Ezalaki mpenza molili na lolenge ete okokaki ata kosimba yango.

²²⁰ Pe makambo ekómi mpenza penepene bongo mikolo oyo, ntango tozali komona lingomba oyo ezali kozanga kososola

Liloba na Nzambe; ntango bozali komona bana na biso ya basi ya Siona kosala makambo oyo bazali kosala; ntango bozali komona bandeko na biso ya mibali komela makaya pe masanga, pe—pe kosala maseki ya bosoto pe nyonso, pe kokoba koyambola ete bazali Baklisto. Hólalá, molili ekoti. Molili makasi ekoti.

221 Tozali komona elembo ya Boyei na Ye. Ekozala . . . Molili ekómaka ntango nyonso makasi liboso ete ntongo étána. Nsima na yango Monzoto na Ntongo ebimaka mpo na kopesa moi mbote, pe, lokola motindami, kotalisa ete moi ezali koya. Botala malamú.

222 Kuna na kati, ntango babomaki minda, elenge mwasi moko agangaki na mongongo makasi mpenza. Elenge mobali moko atelemaki pembeni na mokambi, amonaki mokambi yango ntango abomaki minda. Pe etikalaki mpenza moke ete elenge mwasi yango asenzwa. Azalaki koganga, kopumbwawumbwa. “Oh! Likambo nini ekosalema sikawa? Likambo nini? Likambo nini?”

223 Boyebi eloko nini elenge mobali alobaki na mongongo makasi? Alobaki: “Kobanga te, ndeko mwasi. Mobali moko azali awa oyo akoki kopelisa minda.”

224 Yoka, ndeko mwasi, okoki kokanisa ete tozali moke pe ebele te. Kasi, kobanga te. Mobali moko azali awa Oyo akoki kopelisa minda. Ezali nde Molimo Mosantu. Bondimi yango? [Losambo balobi: “Amen.”—N.D.E.]

225 Togumba mitó mwa moke. Bolimbisa ngai ndenge naumisi bino.

226 Ee Nzambe monene ya Likolo, Yo oyo ozali komizipola, Ozali komimonisa, Ozali komitalisa, Mokonzi monene ya Nkembo, kamata bitaliseli mikemike oyo, na mpokwa oyo, pe tika ete ekweya na mitema ya bato. Pe tika ete tomona Ye oyo azipolami, Ye Oyo akitaki pe apasolaki ezipeli ya tempelo; pe na nsima abimi mbala moko na ezipeli yango, pe akotaki lisusu mbala moko kati na bizipelo ya bato, na Mokolo ya Pantekote; Azalaka ntango nyonso ndenge moko, kobongwana longwa na Nkembo moko kino na Nkembo mosusu.

227 Pe sikawa tozongi mbala moko, mbala moko na Momboto ya ebandeli, lokola ekelamu nyonso esalaka, longwa na eleko moko ya lingomba kino na mosusu. Pe kati na eleko oyo ya suka, biso oyo, tozongi mbala moko na Eloko ya ebandeli oyo ekitaki na Mokolo ya Pantekote, mpo na kokokisa Likomi moko na moko, “Pole na ntango na mpokwa,” pe, “Misala mizali Ngai kosala, bokosala yango pe lokola,” pe makambo mosusu ebele oyo Olakaki kati na Liloba na Yo.

228 Tata, soki moto moko azali awa oyo naino akátísá ezipeli yango te, to soki moto moko azali awa oyo amekolaki kaka moto moko oyo asila kokatisa ezipeli, pesa ye ngolu na mpokwa oyo,

Tata. Tika ete bamona Molongi na nguya oyo azali awa, oyo atondi na ngolu pe na nguya, ya kolimbisa. Kokisa yango, Tata.

229 Pe wana togumbi mitó, bato mosusu bazali awa? Nalingaki nde koloba, bato boni bakolinga koloba: “Ndeko Branham, natomboli loboko na ngai. Bondela mpo na ngai?” Kaka ndenge ogumbi motó, tombola loboko: “Nalingi nakatisa ezipeli moko na moko, kino námona mpenza Molongi.” Nzambe apambola yo. Hólalá, maboko ebele! Kuna likolo na ba-balkon, na loboko ya mobali? Nzambe apambola bino. Na ba-balkon kuna na suka? Botombola. . . Nzambe apambola bino. Bozala mpenza sembo. Na loboko ya mwasi? Tombola loboko, loba: “Ndeko Branham, atako nazalaki Moklisto mibu ebele, kasi, ya solo, naino nakátísá ezipeli yango te. Naino mpenza nakátísá yango te. Nazangi Eloko oyo bango bazaláká na yango kalakala.” Lelo, tozali na. . . “Nazali nzete oyo bato bakolisi na mayele na bango.”

230 Ndakisa felele oyo ekolisami na mayele ya bato, osengeli kobondela yango, kobondela-bondela yango, koniakela yango nkisi, kotiela yango mai. Kasi nzete ya solosolo oyo ekoli na biliki, ezali na felele ya motindo moko, ekokani na yango; ezuka ata litanga ya mai te, kasi ata banyama ya mikemike bamatelaka yango te. Ezali makasi. Ezali ya solosolo.

231 Bokoki kokokanisa Boklisto ya lelo, na Boklisto oyo ezaláká kalakala? Bokoki komikanisela etonga oyo, oyo tozali kobenga lelo Baklisto, na mokili mobimba, ete bazali lokola baoyo bazalaki na nsima ya Pantekote; babondelaka pe babondelakabondelaka bango, balongwaka na lingomba moko pe bakei na mosusu, pe, soki olobi likambo moko oyo esepelisi bango te, batelemi pe bakei? Pe, oh, bokoki komikanisela likambo ya boye? Te. Likambo nini? Ezali bomekoli.

232 Michel-Ange oyo asalaki ekeko ya Mose, okoki kosomba ekeko oyo bamekoli, na ntalo moke. Kasi, oyo ya ebandeli?

233 Moto oyo ayemaki Elambo na Nkolo, nabanzi ete liyemi oyo ya ebandeli ekoki kotekama na ba-millio ya dollar, soki bakokaki lisusu kosomba yango. Nayebi kutu ata esika ezali te. Kasi okoki kosomba oyo bamekoli na ntalo moke ya dollar moko na meya ntuku libwa na mwambe. Okoki kosomba yango.

234 Ezali pe bongo lelo. Moklisto ya ntalo moke, oyo ya komekola, oyo akoti kaka na lingomba, okoki kosomba ye na likaya to—to na mwa kopo ya masanga. To, mpo na mwasi oyo akati nsuki to apakoli langi na mbebo, okoki kosomba ye na makambo ya mokili ya mikolo oyo. Kasi oyo ya solosolo okoki kosimba ye te.

235 Namoni Ye polele mpenza, motindo moko lobi, lelo, pe libela.

236 Oh, Moklisto, olingi kokóma Moklisto ya solosolo te? Soki bato bazali oyo batombolaki maboko te, bakolinga kotombola yango? Boye, nalingi kobondela sikawa. Nzambe apambola bino.

Nzambe apambola bino. Oh, ezali malamu mpenza. Botala naino kuna.


²³⁷ Tata na biso na Likolo, “Liloba na Yo ekozonga epai na Yo mpamba te.” Yo nde opesaki elaka. Ngai nazali kaka na mokumba ya koloba ete Yo nde olobaki Yango. Nazali kaka kozongela Maloba na Yo. Olobaki: “Ye oyo akoyoka Liloba na Ngai pe akondima Oyo atindi Ngai, azali na Bomoi ya Seko.” Olakaki yango.

²³⁸ Pe, Nkolo, toyebi ete lelo tozali na baoyo ya komekola, mingi bazali koloba ete bandimi, nzoka nde, bandimi te. Ezali komonana polele. Kasi, Nkolo, baoyo ya solosolo pe bazali.

²³⁹ Nabondeli ete Okokisa yango, awa, na mpokwa oyo, ete mobali nyonso pe mwasi nyonso, elenge mobali to mwasi, ata soki bauti na ekolo nini, bazali na loposo nini, bazali bato ya losambo nini, E Nzambe, tondisa bango. Tika ete bamona komonisama mpenza ya Yesu moko wana lelo, kati na biso, ndenge Azaláká na Mokolo ya Pantekote, ntango Amimonisaki Ye moko, lokola Molimo Mosantu, mpo na eleko oyo. Kokisa yango, wana tozali komona Maloba kokokisama, bisakweli kokokisama!

²⁴⁰ Lelo, tozali kokokanisa oyo babengaka lingomba ya mokili, Lisanga ya Mangomba ya Mokili, pe tozali kokokanisa yango na elaka ya Pantekote? Tokoki kokokanisa yango te, ata moke te. Tokoki kosukolisa bilamba na biso ya bosoto na tike wana te.

²⁴¹ Kasi, Nkolo Nzambe, soki tokolinga mpenza kozonga na Liziba yango, kopetolama ekozala, na ntango wana nde lobiko na biso ná Liloba na Nzambe ekokokana. Na ntango wana nde tokoki kosenga biloko na biso. Kokisa yango, Nkolo, na mpokwa oyo, wana nazali kotika bato oyo na maboko na Yo. Pesa moko na moko eloko oyo asengeli na yango, Tata. Tosengi yango na Nkombo na Yesu. Amen.

²⁴² Nzambe apambola bino. Natondi bino, mingi, ndenge botelemaki, pe bozeli ntango molai. Pe bolimbisa ngai ndenge naumisi bino kino na ngonga ya zomi na miniti zomi. Nzambe azala na bino kino nakomona bino lisusu lobi na ntongo. Nazongisi sikawa liyangani, nabanzi, na mokambi ya milúlú. 

NZAMBE NA NGUYA AZIPOLAMI LIBOSO NA BISO LIN64-0629

(The Mighty God Unveiled Before Us)

Liteya oyo ya Ndeko William Marrion Branham, eteyamaki liboso na Ngelesa mokolo ya yambo na mpokwa, mokolo mwa 29 na sanza ya motoba na mobu 1964, na likita ya Lisanga ya Molóngó ya Bato na Mombongo ya Nsango Malamu Mobimba na Hotel Bellevue-Stratfort na Philadelphie, Pennsylvanie, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2012 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org